

關

里

文

獻

考

闕里文獻考卷十七

祀典第三之四

國家有大典大慶若

鼎革若

登極改元若

時巡若

升祔若上

徽號若慶

聖節若武功告成若禱祀百神以及贈諡更封增損祭秩必

遣官詣闕里祭告焉而稽之前代亦多有可紀者考漢光武帝建元五

年冬十月帝征董憲過魯使大司空以太牢祠孔子拓拔魏太武帝

太平眞君十一年冬十一月南伐至魯郡使使者以太牢祠孔子獻

文帝皇興二年以青徐平遣中書令高允兼太常至兗州以太牢祀

孔子北齊文宣帝天保元年夏六月以受禪遣使詣魯郡致祭孔父  
唐高宗乾封元年春正月贈孔子太師遣司稼卿秩餘隆以少牢致  
祭曰惟神玉鉤陳貺靈開四肘之源金甌流禴慶傳三命之範神資  
越誕授山嶽以騰英天縱攸高蘊河海而標狀折衷六藝宣創九流  
睿乃生知靈非外獎於是考三古褒一言刊典謨定風什莊敬之容  
畢備鐘鼓之音載和父子爰親君臣以穆蕩乎煥乎樂正雅頌各得  
其所可不謂至聖矣夫朕以涼德嗣膺神器式崇祇配展義云亭感  
周禮之尙存悲素王之獨往杼軸洙泗如挹清瀾雷連舞雩似聞金  
奏昌門曳練徒有生芻之疑漢曲移舟非復祥萍之實慨然不已爰  
贈太師堂宇卑陋仍命修造襲聖子孫合門勿事庶能不遺百代助  
損益之可知永鑑千年同比肩而爲友聿陳菲奠用旌無朽梅曙霞  
梁松春月牖德音暢而無斁形神忽其將久倘弗殊於生前亦知榮  
於身後二月己亥成禮後周太祖廣順二年夏五月遣端明殿學士

顏行詣曲阜祀文宣王廟宋真宗大中祥符元年冬十一月加謚孔子廟聖文宣王遣行吏部尙書清河郡開國公張齊賢祭告曰朕以有事岱宗畢告成之盛禮緬懷闕里欽設教之素風躬謁奠於嚴祠特褒崇於懿號仍令舊相載達精誠昭薦吉蠲用遵典禮以兗公顏子等配是月辛酉成禮又追封孔子父叔梁齊國公母顏氏魯國太夫人遣都官員外郎王勵祭告又追封聖配元官氏鄆國夫人令兗州遣官詣曲阜祭告又以王欽若言祭文宣王詣墳致奠得芝五本詔遣楊懷玉祭謝仁宗嘉祐六年頒御書飛白殿榜遣兗州通判田洵祭告曰惟王淵聖難名誠明異稟敷厥雅道大闡斯文生民以來至德莫二教行萬世儀比三王闕里之居祠宇惟煥遐瞻牆仞逖遡門扉奮於飛柴之蹤新茲標榜之制命工庀事推策涓辰敢議形容盍申崇奉仰惟降格遙冀鑒觀春三月壬寅成禮金章宗明昌六年以曲阜新廟告成遣兗州節度使孫康致祭曰國家禮崇儒術道

尊聖師闕里廟貌于以新之雅樂具舉法服彰之庶幾盛格永集繁  
禧秋八月己未成禮元大德十一年武宗卽位加號孔子爲大成至  
聖文宣王明年改元至大遣集賢學士王德淵齎銀幣詣闕里祭告  
曰惟王秉德生知垂教不朽聖之時者天何言哉由百世之後莫能  
違自生民以來未之有特加封號大展祭儀仍命臣僚往闕里廟以  
亮國公鄒國公配秋七月丁卯成禮四年仁宗卽位遣國子祭酒劉  
賡齎銀幣雜綵詣闕里祭告孔子曰天以神器畀付朕躬受命維新  
若稽舊典肇修禋類徧于羣神仰惟聖人模範百世功隆德盛宣極  
欽崇爰命儒臣恭謁闕里侑茲儀物牲用太牢昭薦厥誠尙祈鑒格  
以亮國公鄒國公配冬十月辛未成禮延祐七年英宗卽位遣說書  
王存義齎金幣詣闕里以太牢祭告孔子曰惟王天縱聖集厥大  
成儀範百王賢於堯舜嗣服伊始恭祀告虔尙冀格思永昌文治夏  
五月丁亥成禮遣存義時帝手以香加額授之至治三年泰定帝卽

位冬十一月遣使詣闕里以太牢祀孔子文宗天歷二年春二月遣翰林侍講學士曹元用捧金幣詣闕里祭告孔子順帝至元元年遣翰林修撰王思誠詣闕里以太牢祭告孔子五年以重修曲阜孔子廟成遣五十四代孫監察御史思立樹碑紀績以太牢祭告曰伏以列聖右文宮牆旣葺立言成績貞石著辭裔孫承休作我司憲俾致嘉告以祚無疆謹以香酒太牢粢盛制幣式陳明薦秋八月己酉成禮六年遣翰林修撰周伯琦奉香酒詣闕里致祭孔子秋八月丁亥成禮至正二年冬十月遣集賢直學士郭孝基致祭孔子孝基奉香酒詣闕里以十二月丁巳致祭曰惟王宗主名教表正彝倫並日月明同天地仁晝萬古之夜人四海之民惟中國之爲中國實有賴於斯文欽惟皇上念闕里爲毓聖之地故特祭遣一介之臣香承手錫酒分上尊惟中書欽若休明用敬助相禮之錢緡牲牢旣設簋簠斯陳神之格思歆此明禮以亮國復聖公廓國宗聖公沂國述聖公鄒

國亞聖公配按歷代遣官祭告闕里皆欽頒祭文獨此使官自致辭乃創格非故事也八年秋七月遣宣文閣授經郎董立奉香酒乾羊詣闕里致祭孔子八月庚辰成禮十六年春二月遣集賢直學士楊俊民詣闕里致祭孔子明太祖洪武元年春二月遣使詣闕里致祭孔子臨行帝諭使者曰仲尼之道廣大悠久與天地相並有天下者莫不虔修祀事朕爲天下主期大明教化以行先聖之道今旣釋奠成均仍遣爾修祀事於闕里爾其敬之二年出內府香幣白金遣五十五代衍聖公國子祭酒克堅祀孔子於闕里命通贊舍人張漢英爲副帝諭克堅曰先師孔子萬世帝王之師爾先師子孫祭必歆饗宜致誠潔以副朕懷克堅奉命恭詣闕里祭告曰惟神昔生周天王之國實居魯邦聖德天成繼述前王治世之法雖當時列國鼎峙其道未行垂教於後以至於今凡有國家大有德焉自漢之下以神通祀海內朕代前王統率庶民目書檢點忽睹神之訓言非其鬼而祭

之諂也敬鬼神而遠之祭之以禮此非聖賢明言他何能道故不敢  
通祀暴殄天物以累神之聖德茲以香幣牲齊粢盛庶品式陳明薦  
惟神鑒焉冬十二月癸巳成禮成祖永樂十四年修曲阜孔子廟成  
遣官祭告闕里宣宗宣德元年遣五十五代孫太常寺寺丞克準詣  
闕里祭告孔子曰仰惟先聖丕隆道德表正綱常集羣聖之大成爲  
百王之儀範茲余嗣位之初謹用祭告永資聖化翼我治平春二月  
乙亥成禮時自先師而下四配十哲兩廡凡九壇均用太牢英宗正  
統元年遣國子司業趙琬詣闕里祭告景帝景泰元年遣翰林侍講  
吳節詣闕里祭告孔子曰仰惟先師丕明古昔帝王之道以正綱常  
垂憲萬世功高德厚與天地同子嗣承大統祇嚴祀事用祈神化祐  
我治平春閏正月庚申成禮英宗復辟天順元年遣工科左給事中  
孫昱詣闕里祭告天順八年憲宗卽位秋七月遣官詣闕里祭孔林  
明年改元成化又遣吏部侍郎尹旻詣闕里祭告孔子曰惟王以天



縱之聖爲文教之宗萬世之下綱常正而世道隆實有賴焉茲予嗣位之初景仰維深特申祭告永資聖化翊我皇猷春三月壬午成禮十三年以加籩豆侑舞之數遣翰林學士王獻諱闕里祭告孔子曰惟王生知之資天縱之聖道德配於二儀教法昭於萬世緬懷功烈宜極褒揚顧冕服之章數雖降而祀享之儀物弗稱爰考彝章參合輿論增樂舞爲八佾加籩豆爲十二簋用祭天享地之禮樂庶副尊師重道之本意也特遣儒臣遠詣闕里用伸祭告王其鑒知春閏二月丁巳成禮孝宗卽位弘治元年遣太常寺少卿田景賢詣闕里祭告孔子文與宣德元年同十二年以闕里廟災秋七月遣太常寺少卿李傑詣闕里慰祭孔子曰惟王道德高厚教化無窮廟貌尊嚴古今崇奉比遭回祿煨燼靡遺斯文在茲胡天弗弔肆維統緒承傳在予修復舊規所不敢後特申祭告奉慰聖靈洋洋在天尙其歆鑒九月庚午成禮十七年重修闕里廟成勅大學士李東陽曰比因闕里

文廟燬於回祿爰命有司重建厥功旣成茲遣卿往彼祭告夫先師  
道德萬世所宗鼎新廟庭一代之盛典以故禋告之禮特委輔弼之  
臣卿其精白一心寅恭將事務期聖靈昭格以副朕隆師重道之懷  
東陽承命奉香祝詣闕里祭告曰惟我先師代天立教禮嚴報祀四  
海攸同嶽降在茲廟貌自古頌罹災變實警予衷爰勅有司命工重  
建越暨五載厥功告成棟宇畢新器物咸備光昭儒道用妥聖靈特  
遣輔臣遠將祭告尙祈歆鑒永享明禋夏閏四月丁亥成禮武宗正  
德元年春二月遣官詣闕里祭告孔子八年以討平劉七等遣山東  
巡撫趙璜詣闕里祭告孔子曰比歲盜起北方肆行東郡屢經闕里  
侵犯廟庭蓋嘗申命將官分兵守護聖靈昭布竟保安全逆亂旣平  
儀文斯舉聿嚴祀事兼飭有司洒掃汙萊修葺損壞式還舊制仰慰  
明神尙祈鑒歆永祐邦國春正月壬午成禮世宗嘉靖元年遣吏部  
尙書石瑄詣闕里祭告孔子文與成化元年同春三月丁卯成禮穆

宗隆慶元年遣尙寶寺卿劉奮庸詣闕里祭告孔子曰追維先師道兼羣聖教備六經歷代帝王是宗是式茲予踐祚之始良深景慕之懷特遣廷臣用申祭告伏冀昭垂訓迪永祚皇猷秋九月己卯成禮神宗萬歷元年遣尙寶寺寺丞張孟男詣闕里祭告孔子文與隆慶元年同夏四月庚戌朔成禮熹宗天啓元年遣順天府府丞姚士慎詣闕里祭告孔子曰惟我先師生民未有百代莫前凡在斯文實均仰戴茲子肇位景慕良深特遣廷臣虔申祭告尙資神化永祚皇明秋七月丁未成禮莊烈帝崇禎元年遣太僕寺少卿郭興言詣闕里祭告孔子文與隆慶元年同夏五月癸未成禮

國朝順治八年

世祖章皇帝遣右副都御史劉昌詣闕里祭告孔子曰朕惟治統緣道統而益隆作君與作師而並重先師孔子無其位而有其德開來繼往歷代帝王未有不率由之而能治安天下者也朕奉

天明命紹續丕基高山景行每思彰明師道以光敷至教而祀典未修曷以表敬事之誠登嘉平之理茲遣專官虔祀闕里儀惟備物誠乃居歆伏惟格思尙冀鑒饗夏四月癸丑成禮康熙七年

聖祖仁皇帝遣光祿寺卿楊永寧詣闕里祭告孔子文與順治八年同夏四月丁亥成禮十四年冬十二月

冊立皇太子

遣宗人府府丞馬汝驥詣闕里祭告孔子曰朕惟治統緣道統而益隆作君與作師而並重先師孔子德侔天地教範古今歷代帝王咸宗道法用臻治安朕奉

天眷命紹續丕基懋建元儲以崇國本景行至聖肅舉明禋茲遣專官虔申殷薦伏惟鑒格尙冀居歆明年春二月己未成禮二十年冬十二月以削平吳三桂等

遣右副都御史宋文運詣闕里祭告孔子曰朕惟治統緣道統而益隆

作君與作師而並重先師孔子德侔天地教範古今歷代帝王咸宗道法用奏治安朕奉

天眷命紹續丕基翦除兇殘乂安海宇告功至聖肅舉明禋茲遣專官虔申殷薦伏惟鑒格尙冀居歆明年春三月甲子成禮二十七年冬十月恭奉

孝莊文皇后升祔

太廟禮成

遣內閣學士彭孫通詣闕里祭告孔子十二月丙辰成禮三十二年冬十月以重修闕里孔子廟成

遣皇三子詣闕里祭告孔子曰朕惟道統與治統相維作君與作師並重先師孔子德由天縱學集大成綜千聖之心傳爲萬世之師表故廟久遠垂於無窮朕御寓以來立綱陳紀彰教敷治咸奉至聖爲法程凡典禮追崇竭誠致敬自京師下逮郡邑辟離泮水建廟釋奠罔

不修舉况茲闕里乃聖人鍾毓之鄉車服禮器於斯藏守曩者東巡展拜之餘仰觀廟貌因多歷年所漸有頽敝深廬於衷用是命官董理重加修葺棟宇維新以妥聖靈茲當告成特遣皇子允祉致祭俎豆肅陳恍乎接至聖之音容以將朕儼恪欽崇之至意陟降在茲尙祈歆享

詔皇四子皇八子陪祀十一月乙巳成禮三十四年冬十二月以畿輔災傷疊告山西平陽地震

遣右通政使吳涵詣闕里致祭孔子曰仰惟先師道隆參贊德冠古今集聖哲之大成樹人倫之極則朕欽崇至教勤恤民依永期殷阜邇年以來郡縣水旱間告年穀歉登蚤夜孜孜深切軫念用是專官秩祀爲民祈福冀靈爽之默贊溥樂利於羣生尙鑒精忱俯垂歆格明年春正月甲申成禮三十六年秋七月以平殄厄魯特噶爾丹遣翰林侍講學士史夔詣闕里祭告孔子曰朕服膺聖訓殫究遺文凡

茲六籍所垂惟以安民爲要臨御以來孜孜圖治綏乂烝生遠邇中外視同一體乃有卮魯特鳴爾丹荒陬狡寇肆虐跳梁擾毒邊方稔惡已極朕親統六師三臨絕塞宏張撻伐克奏膚功逆孽就俘兇渠殄滅遐荒番部罔不歸誠自茲永靖邊塵咸安生業惟是至聖先師默相啓佑特遣專官敬申禋祀祇告成功伏惟昭鑒八月庚戌成禮四十二年春三月恭遇

聖祖仁皇帝五旬聖壽

遣詹事徐秉義詣闕里祭告孔子夏四月乙酉成禮四十八年

皇太子復立

遣翰林侍講學士梅之珩詣闕里祭告孔子曰惟先師孔子聖由天縱德集大成闡明六經師表萬世永立人倫之極式端道統之原朕仰荷

天庥俯臨海宇建立元良歷三十餘載不意忽見暴戾狂易之疾深惟

祖宗洪業及萬邦民生所繫至重不得已而有退廢之舉嗣後漸次體  
驗當有此事時性生奸惡之徒各庇邪黨借端構釁朕覺其日後  
必成亂階隨不時究察窮其始末因而確知病原皆由鎮厭亟爲除  
治幸賴

上天鑒佑平復如初朕皆因此事耗損心神致成劇疾皇太子晨夕左  
右憂形於色藥餌必親寢膳必視惟誠惟謹歷久不渝令德益昭不  
基克荷用是復正儲位永固國本特遣專官敬申殷薦尙祈歆格夏  
五月庚辰成禮五十二年春三月恭遇

聖祖仁皇帝六旬聖壽

遣戶部侍郎廖騰燧詣闕里祭告孔子五十七年冬十二月恭奉  
孝惠章皇后升祔

太廟禮成

遣內閣學士張廷玉里祭告孔子曰仰維先師德冠古今道隆參



贊作人倫之儀表集羣聖之大成永仰高山欽崇至教朕仰紹  
祖宗續承大統殫精思於六籍期雅化於萬方矩矱前型朝乾夕惕茲  
者

皇妣孝惠仁憲端懿純德順天翼聖章皇后神主升祔

太廟禮成遙深松桷之思爰切羹牆之慕特將牲幣用遣專官降鑒在  
茲尙其歆格明年春二月庚申成禮六十一年冬十一月

世宗憲皇帝登極

遣右通政使楊汝穀詣闕里祭告孔子曰仰惟先師道冠古今教垂萬  
世自生民而未有集羣聖之大成朕自冲齡卽勤向往念

皇考親承道統旣先聖後聖之同符暨眇躬仰契心傳知作君作師之  
一致茲當嗣位之始宜隆祀享之儀特遣專官虔申昭告惟冀時和  
歲稔物阜民安淳風徧洽平寰區文治永光夫前緒尙其歆格鑒此  
精誠雍正元年春正月己酉成禮冬十一月恭奉

聖祖仁皇帝配享

園丘禮成

遣禮部侍郎胡煦詣闕里祭告孔子曰仰惟先師德參兩大教洽羣倫  
紹千聖之心傳備百王之道法朕遙瞻闕里念切景行茲於雍正元  
年十一月二十五日恭奉

聖祖合天弘運文武睿哲恭儉寬裕孝敬誠信功德大成仁皇帝配享  
園丘禮成特遣專官虔申昭告惟冀永著皇風之沕穆益昭文治之光  
華庶鑒精誠尙其歆格二年春二月丁卯成禮是年夏四月

冊封孔子五代爲王

遣禮部尙書張伯行詣闕里祭告孔子曰道尊往聖宜錫類以推恩牒  
溯前徽乃緣情而制禮絲綸聿貢俎豆維新仰惟先師孔子撰合乾  
坤名高日月纂修刪定煥六籍之文明祖述憲章樹百王之儀範朕  
夙承

庭訓嚮往實深誕紹丕基欽崇彌切惟德全而業盛知積厚而流光爰命廷臣式稽譜系詒謀式穀洵篤慶於一門毓秀鍾靈宜上追於五世並躋祀典特晉王封體

皇考敬師之心弘先聖顯親之孝金聲玉振集今古之大成本水源享蒸嘗之美報靈其不昧尙克來歆是月戊寅成禮翼日己卯行

冊封禮祭告肇聖王裕聖王詒聖王昌聖王啓聖王曰欽崇至道爰思毓聖之基特創隆規用沛推恩之典馨香攸薦譜牒增輝惟王系本商宗支分魯邑公族傳爲著姓溯盛德之淵源聖人功在羣倫綿斯文之統緒朕情殷仰止禮極褒崇晉五世之王封絲綸誕賁垂千秋之祀事廟貌常新顯親慰至聖之心錫類廣與朝之澤恩覃闕里報式穀於前徽慶溢膠宮蔚光華於奕禩尙其歆格鑒此殊榮六月闕里孔子廟災

遣禮部右侍郎王景曾詣闕里慰祭孔子曰仰惟先師道高千古業著

六經集聖學之大成樹人倫之標準朕紹承丕緒仰止師範溯譜系以追封入成均而釋奠不謂杏壇之地忽生回祿之災雖像位幸存而榱楹俱燼具聞奏報實切兢惶豈成毀有時竟莫爭於定數恐尊崇未至祇難釋於中懷卽遣所司協同大吏飭工材而備豫占時日以經營將式煥夫宮牆期重新於丹雘辟雍伊邇已親詣以昭虔闕里云遙用專官而展祭慰安靈爽瞻望格歆秋七月癸丑成禮八年秋八月重修闕里孔子廟裝塑聖像成

遣翰林編修開泰齋捧香帛

命督修之通政使畱保祭告孔子曰金聲玉振開宇宙之文明日角珠庭垂聖神之儀範肅敷筵几聿薦藻蘋仰惟先師孔子學綜圖疇統承堯舜道超萬類喻河海泰嶽之崇深德服羣賢比江漢秋陽之皎潔溫良恭讓之度邦國共欽齊莊中正之容簡編備載新營廟貌虔製豆遵竭誠敬之心思極尊嚴之規制乃者歲逢庚戌序屬仲秋上

溯周朝近當今日推之長歷卽尼山降誕之時卜以良辰是闕里增輝之會用稽徽典適協貞符於戲棟宇恢宏已慶雲霞之糾縵堂楹端儼重瞻日月之光華神鑒孔昭苾芬歆享是月癸亥成禮冬十月又以新廟告成

**遣**

皇五子詣闕里祭告孔子曰達天盡性樹萬世之師模車道尊經煥

千秋之廟貌肅將嘉祀用告成功仰惟先師孔子得聖之時由天所縱纂修刪定啓宇宙之文明祖述憲章綜帝王之統緒升堂入室弘施樂育之恩學禮誦詩永作義方之矩比高懸之日月亘古莫踰喻出類之鳳麟生民未有奉遺編而欽企儀典務極其推崇循舊址而鼎新經營必盡其誠敬頒夫國帑董以大臣每繪式以先呈乃按圖而指授榱桷栝柏求大木於名山簞簋樽罍選良工於內府晁熒黃瓦準制度於宸居璀璨玉圭儼威容於聖座懸標題之巨榜灑翰親書建屹峙之豐碑摛文恭紀工程累歲時深嚴恪之心棟宇宏規益

備觀瞻之美華榱雕柱增輝講道之壇璆磬金鋪重振大成之殿數  
仞之宮牆逾峻兩楹之俎豆虔陳特遣皇五子親詣几筵敬行告祭  
於戲卿雲紉縵已開丹雘之祥古檜貞堅佇望青蒼之色惟祈鑒格  
式享苾馨十二月乙巳成禮同日又

遣多羅淳郡王弘暉祭告崇聖祠不讀文行三獻禮十三年秋八月  
今皇帝登極

遣太常寺少卿納爾泰詣闕里祭告孔子曰仰惟先師道媿勲華功參  
天地金群玉振集千聖之大成韶舞夏時開百王之至治我

皇考隆師重道禮儀備極夫尊崇予小子典學研經誦法恆深夫嚮往  
茲屬膺圖之始宜修展祀之儀敬遣專官虔申昭告惟道德文章之  
要作君兼懋夫作師念修齊平治之規後聖實承夫先聖仰祈昭鑒  
啓牖文明祇薦明禋尙惟歆格冬十二月庚辰成禮乾隆二年夏四  
月恭奉

世宗憲皇帝配享

園丘禮成

遣左副都御史陳世倌詣闕里祭告孔子曰仰惟先聖德合乾坤光昭日月樹百王之範集千聖之大成朕欽崇至道嚮往維殷茲於乾隆二年四月十六日恭奉

世宗敬天昌運建中表正文武英明寬仁信毅大孝至誠憲皇帝配享園丘禮成特遣專官虔申昭告惟冀丕煥文明之盛永臻熙皞之風鑒此精誠庶其歆格十四年春二月以討大金川平定

今皇后攝六宮事恭上

皇太后徽號

遣太僕寺卿阿蘭泰詣闕里祭告孔子曰惟先師垂經教孝備武修文立道綏和合南北東西而思無不服聖神美大比高明博厚而德更難名瞻萬仞之宮牆特崇典禮肅千年之俎豆敬展明禋茲以邊徼

敕寧中宮攝位

慈寧晉號慶洽神人爰遣專官用申殷薦仰惟歆格永錫鴻禧夏六月

癸未成禮十五年秋八月

皇后正位中宮恭上

皇太后徽號

遣鴻臚寺卿吳應枚詣闕里祭告孔子曰惟先師垂經立教勸學明倫立道綏和比堯舜而功爲益遠聖神美大配天地而德更難名瞻萬仞之宮牆特崇典禮肅千年之俎豆敬展明禋茲以正位中宮鴻儀懋舉

慈寧晉號慶洽神人特遣專官用申殷薦仰惟歆格永錫鴻禧冬十月壬申成禮十六年春正月

皇上南巡經山東

遣通政使富森以是月丁卯致祭孔子曰仰惟先師時中運世先覺膺



民集羣聖之大成等百王而未有朕欽崇至道仰止遺風希聖之情  
載勞寤寐茲以觀風吳會道出魯邦仰數仞之宮牆杏壇在望瞻兩  
楹之俎豆闕里非遙特遣具官虔修祀事庶幾靈鑒尙克來歆冬十  
一月恭遇

皇太后六旬聖壽恭上

徽號

遣鴻臚寺卿儲麟趾祭告孔子曰惟先師垂經立教勸學明倫立道綏  
和比堯舜而功爲益遠聖神美大配天地而德更難名峻萬仞之宮  
牆肅千年之俎豆茲以

慈寧萬壽懋舉鴻儀敬晉

徽稱神人慶洽爰申殷薦特遣專官冀鑒慈忱永綏多福明年春正月

丙子成禮二十二年春正月癸卯

皇上南巡道經山東

**遣**

協辦大學士戶部尚書蔣溥祭告孔子曰惟先師德備時中功參化育紹心源於往代祖述憲章傳道統於後人贊修刪定金聲玉振集羣聖之大成觀海登山爲生民所未有儀型萬古若日月之莫可踰秩祀千秋與乾坤而俱不朽朕言循東魯再蒞南邦釋奠而謁杏壇屈指甫週乎一載揚旌而瞻闕里抒誠用遣乎專官敬薦明禋式遵舊典宮牆遙望彌深仰止之情俎豆常新永啓右文之治神其鑒格庶克來歆是月丁巳成禮二十四年冬十一月酉師克捷回部蕩平

**遣**

通政使圖爾泰詣闕里祭告孔子曰惟先師德備中和功參位育覆幬持載合東西南北以歸仁立道綏和邁文武聖神之廣運望防尼而仰止景行時切高山溯洙泗之淵源誦法有同觀海茲以西師克捷回部蕩平擴一統之車書絕徼遠傳夫凱奏肅千秋之俎豆明禋敬展乎杏壇特遣專官用將殷禮伏維昭鑒來格馨香十二月丙申成禮

述曰自東漢建武之歲訖今閱一千七百餘年祭告之典凡六十有九事而我

朝百有餘年實居二十六焉以

**聖**人而尊禮聖人蓋實有度越前古者然此六十九事中闕其文者三十有三佚其日者二十有一失其使臣姓氏者九并佚其官者又八則甚矣文獻之無徵也嗚呼求徵於前已不可及矣欲傳於後及今猶可爲也然則茲考之作又奚容緩諸

闕里文獻考卷十七終

闕里文獻考卷十八

世爵職官第四

汾既敘祀典考備述我

朝褒崇先聖諸盛典及歷代尊禮之制矣竊又念宗子世爵所以主  
祀事者也支子及諸賢裔皆世官所以分承祀事者也其同異姓百  
執事之駿奔在廟者則又罔非襄茲祀事者也故繼祀典而詳考其  
建置之由因革之制按孔氏世嫡自漢高帝過魯封九代孫騰爲奉  
祀君始創推恩之例而尙未有世爵元帝卽位賜十三代孫霸爵關  
內侯號褒成君詔以所食邑祀孔子子孫世襲於是始有世爵主祀  
者矣平帝元始元年加封霸曾孫均爲褒成侯東漢和帝永元四年  
改封均孫損爲褒亭侯損孫羨魏文帝黃初二年封宗聖侯晉武帝  
泰始三年改封羨子震爲奉聖亭侯江左因之後魏旣并魯郡孝文  
帝延興三年以羨六代孫乘爲崇聖大夫太和十九年封乘子靈珍

爲崇聖侯襲三世至長孫北齊文宣帝天保元年改封恭聖侯周宣  
帝大象二年又晉爵鄒國公隋煬帝大業四年封長孫子嗣哲爲紹  
聖侯唐高祖武德九年封嗣哲子德倫爲襲聖侯再襲至孫璿之元  
宗開元二十七年追諡孔子爲文宣王遂加封璿之爲文宣公傳至  
四十六代孫宗愿凡襲封者十二世宋仁宗至和二年以直集賢院  
祖無擇言不宜以祖之美諡加其後嗣乞別定封號於是詔改封宗  
愿爲衍聖公子若蒙襲爵哲宗元祐元年改封奉聖公徽宗崇寧三  
年復改衍聖公歷金元明以迄

國朝皆相沿無異世爵之秩漢關內侯爵第十九等襲成侯襲亭侯  
爵第二十等魏宗聖侯爵第十八級南宋奉聖亭侯秩第五品陳奉  
聖亭侯爵第八品秩視千石北魏崇聖大夫秩從五品中崇聖侯秩  
從二品北齊恭聖侯秩第三品唐太宗貞觀十一年詔襲聖侯朝會  
位同三品中宗神龍元年授朝散大夫肅宗上元二年命文宣公位

二品文官下後周太祖廣順二年賜五品服宋元祐間改衍聖公爲奉聖公遇郊祀大禮赴闕陪位在寺監長官之下別作一班金熙宗皇統二年授衍聖公階文林郎章宗明昌二年特令視四品晉階中議大夫六年講定禮儀衍聖公陪位在寺監長官下元太祖二十年給四品印世祖時改五品階奉訓大夫仁宗延祐三年仍復中議大夫給四品印泰定帝四年以山東廉訪使王鵬南言陞爲三品階嘉議大夫文宗至順三年少監歐陽元又言衍聖公爵最五等秩登三品而用四品銅印不稱因改給三品印順帝至正八年朝議又以公爵與階不稱晉中奉大夫秩從二品改給二品銀印明太祖洪武元年初授正二品資善大夫班亞丞相後革丞相令班列文臣之首十七年又詔旣爵公勿事散官給誥用織文玉軸同一品景帝景泰三年改給三臺銀印如正一品賜玉帶織金麒麟袍遂爲例朝服公服常服皆同一品冠八梁帶珮與綬俱用玉笏用象牙憲宗天啓二年

始晉公孤等銜

國朝順治元年題准封爵一如前朝階正一品班列尙書上二年改賜三臺銀印十三年依例授光祿大夫十六年又改給清漢文三臺銀印乾隆十三年清篆文成更百官印章十四年改給衍聖公清漢篆文一品三臺銀印其祿漢關內侯食邑八百戶襲成侯食邑二千戶袁亭侯食邑千戶魏宗聖侯食邑百戶晉奉聖侯食邑二百戶後魏崇聖大夫食邑五百戶崇聖侯北齊恭聖侯周鄒國公隋紹聖侯唐襄聖侯文宣公皆食邑一百戶宣宗大中元年歲給封戶絹百疋宋金各有食邑又依品秩及兼職給祿元成宗大德四年依四品官俸月給中統鈔二錠仁宗延祐三年增給月俸至五百緡明太祖洪武元年賜給祭田二千大頃供祭祀以其羨餘存爲廩祿不復更給月俸衍聖公世子明神宗萬歷二十二年題准服麟袍犀帶莊烈帝崇禎二年加玉帶

國朝順治二年題准嫡長子至十五歲授二品冠服衍聖公任子始於唐時唐元和十三年穆宗卽位恩詔予文宣公一子官武宗會昌五年大中元年僖宗乾符二年並以郊祀推恩文宣公廕一子出身至

國朝有大慶典衍聖公並蒙

**錫廕**初公階正一品而廕子則仍依正二品康熙六十一年始視正一

品大臣廕一子五品官著爲例行聖公之屬有翰林院五經博士太常寺博士國子監學錄學正四氏學教授學錄至聖廟執事官六品官族長舉事典籍司樂屯田管勾守衛林廟百戶知印掌書書寫奏差伴官等員

翰林院五經博士十五員正八品孔氏北宗一員奉中書書院祀南宗一員奉衛州孔子廟祀先賢顏子曾子孟子閔子冉子伯牛冉子仲弓端木子仲子言子卜子顓孫子有子後裔各一員奉諸賢祀東



野氏一員奉元聖周公廟祀考博士之設仿於前明景帝景泰二年命禮部召取顏孟子孫長而賢者各一人至京師官之明年以顏希惠孟希文爲五經博士此博士之所由始也武宗正德元年用衢州知府沈杰言授孔彥繩五經博士主衢州孔子廟祀事於是南宗始有博士矣二年五十八代孫三氏學學錄公璜奏言鄒縣城南巽隅古有子思書院實子思子講道之所孟母徙舍學宮之旁之遺址也前代設山長類多孔氏子孫爲之元季始廢每遇歲時朔望薦享無聞乞依顏孟程朱恩典擇孔氏次嫡之賢者授以世職帝允其請而述聖又有博士矣世宗嘉靖十二年學士顧鼎臣奏稱孝宗時官顏孟子孫各奉祀事可謂盛舉而曾子之後獨不沾一命之榮亦古今缺典乃詔求曾子後人得曾質粹於江西十八年授爲五經博士令遷山東之嘉祥縣奉曾子廟祀而宗望裔又有博士矣莊烈帝崇禎十六年以六十五代孫聖公奏詔授先賢仲子嫡裔仲于陞爲五經

博士而仲氏又有博士矣

國朝康熙二十三年

聖祖仁皇帝幸魯周公七十三代孫東野沛然上言顏曾孟仲得聖道之傳皆有世襲博士以優其後臣祖周公以元聖之德制作經緯固與孔子並列久矣而今祠宇頽壞拜謁寂寥主壑僅以青衿祭田不及百畝不惟不能並尊於孔子且不得比於顏曾孟仲乞念傳道之功稍加優隆奏上下禮部議部臣以無故事具覆

詔曰周公承接道統繼往開來功德昭著其子孫應否給與職銜著九卿詹事科道會同確議具奏九卿詹事科道等議曰周公後裔古雖無給有官職者恭遇我

皇上崇文重道之時宜授官職撥給祀田修葺廟宇以彰殊恩曠典於是以東野沛然爲五經博士三十九年又

詔置閔氏端木氏五經博士各一員五十一年又

詔置言氏五經博士一員五十九年又

詔置卜氏五經博士一員雍正二年

世宗憲皇帝視學

諭禮部等衙門議先賢先儒之後當增置五經博士者廷臣以伯牛仲弓再求宰子子張有若六人請

上命廷臣再議乃去宰子冉求而伯牛仲弓子張之裔皆以次授五經博士惟有子之後訪求嫡裔尚未得右五經博士獨孔氏北宗以衍聖公次子承襲餘皆以嫡長無嫡長方以次子無嫡子方以庶子雍正三年禮部侍郎王景曾奏准嗣後應襲職者十五歲以上送禮部考試乃准襲不堪襲者令回再肄業三年然後襲職此外先儒周程張朱邵韓之裔亦皆置有五經博士以非衍聖公所屬故不載太常寺博士一員正七品奉聖澤書院祀未審建置之始

國朝順治元年山東巡撫方大猷題准依前明舊制以衍聖公第三

子承襲

國子監學錄二員正八品

乾隆元年改定

一奉尼山書院之祀一奉洙泗書院

之祀元順帝至元二年初設山長以異姓碩儒任後令衍聖公保舉

族人之賢者爲之明武宗正德二年改名學錄秩從九品

國朝順治元年山東巡撫方大猷題准照舊舉用

國子監學正一員正八品

乾隆元年改定

奉儀封聖廟祀考唐天寶間文宣公

避亂遷居寧陵者數世遂於其地建立聖廟後以子孫流寓寧陵者

主其祀事會河圮遷居儀封明英宗正統九年詔卽於儀封立廟世

宗嘉靖十四年始置官以孔承寅爲學正秩正九品令世襲

國朝順治八年學正員缺六十六代衍聖公秦准世襲如故

孔顏曾孟四氏學教授一員正七品

乾隆七年改定

掌訓課四氏生徒四氏學

初名廟學宋真宗時楊光輔以講書轉奉禮郎猶未專設官也至哲

宗元祐元年始置廟學教授一員於舉到文官內差或委本路監司

舉有義行者爲之後又增入顏孟二氏子孫金章宗明昌元年勅於四舉五舉終場進士出身人內選博學經史衆所推服者充秩正八品元世祖因之改秩爲九品仁宗延祐六年議准三氏子孫學官初本不以常例拘之後來有司不體優待聖賢之意將聽除人一概注授遂使學校廢弛已後注用人員必聽衍聖公遴選以爲定制明太祖洪武元年改名三氏子孫教授司秩從九品憲宗成化元年始頒給印信稱三氏學神宗萬歷間增入付氏又改名四氏學

國朝康熙四十一年六十七代衍聖公奏准陞轉與各府衛教授同雍正十二年七十代衍聖公廣榮題准本學生亦得一例揀選保用乾隆二十六年覆准山東布政使崔應階條奏令衍聖公將揀選應用人員移送撫臣驗看再送部具題并定爲四氏學學錄陞階嗣後缺出如孔氏見任學錄內有文行兼優已歷俸六年堪勝保送之員准一體揀選陞補

孔顏曾孟四氏學學錄一員正八品

乾隆十三年定

掌副教授訓迪生徒而教

公之胄子宋元祐四年始置考當時尙有學正一員與學錄同以孔

氏充而令教授自署金元開闢用異姓正錄秩皆九品明太祖洪武

七年裁學正止設學錄一員秩未入流宣宗宣德元年定以聖裔任

而令衍聖公保舉孔氏生員年德俱尊學問優長者咨部除授

國朝順治元年巡撫方大猷題准照舊舉用乾隆二十六年覆准山

東布政使崔應階條奏於孔氏歲貢廩生捐貢及廩生內揀選照教

授見例令衍聖公將揀選應用人員移送撫臣驗看再送部具題

聖廟執事官四十員三品二員四品四員五品六員七品八員八品

十員九品十員凡祭祀掌分獻及爵帛香祝之執事雍正八年

**世**

宗憲皇帝諭曰惟至聖先師孔子道冠百王功高萬世朕景仰企慕

寤寐弗諼備舉崇奉之儀用申報享之願查世襲官爵歷代俱有成

規而聖廟執事人向來未加爵秩所當廣置官僚以光祀典今欲特

設聖廟執事官三品者二員四品者四員五品者六員七品者八員  
八品九品各十員各按品級給與章服每逢聖廟祭祀之時虔設冠  
裳駿奔趨事凡此人員著衍聖公於孔氏子孫內選擇人品端方威  
儀嫻雅者報部充補彙奏以聞每年各給俸祿銀二十兩其孔氏子  
孫內有情願充補之人或曾經出仕而退休在籍者或身有職銜而  
未曾出仕者以及貢監生童等皆可入選若屆鄉試之期有情願入  
場者准以監生入場應試朕意如此著大學士等會同該部定議具  
奏部議俸祿於山東藩庫支領所設各官內如有就選中式及丁憂  
等項事故所遺之缺令衍聖公另行揀選擬補報部彙奏乾隆三年  
七十代衍聖公廣榮請給封典得

旨依請而監察御史陶正靖上言曲阜之祀衍聖公主之與太學釋奠  
不同準之古禮宜從公侯之制通議等階未免踰越又孔氏原有博  
士典籍管勾等官足供饔豆其品官宜姑仍舊貫遇有事故停止充

補經部議稱執事各官雖分品級止屬虛銜若照伊等品級得封於名器不甚允協但既經奏准給封應照本身實在職銜酌量分別給以應得封典其原無職銜之貢監生童等援照五經博士之例俱以八品給封至此等官原係

**世宗**憲皇帝特旨增設以明重道尊師之至意不便遽行停止嗣後缺出應令衍聖公會同山東學臣於孔氏族人內秉公揀選務必人品威儀堪膺駿奔之選者報部充補如有徇濫察出照例分別查議世襲六品官一員掌分獻崇聖祠由世職知縣改置考孔氏子孫之爲曲阜縣令仿於唐懿宗咸通閒四十代孫續至後唐始以文宣公兼之宋眞宗大中祥符元年改曲阜爲仙源縣特令四十四代孫勛以太常博士知縣事仁宗皇祐三年詔兗州仙源縣自國朝以來世以孔氏子孫知縣事使奉承廟祀近歲廢而不行非所以尊先聖也今後宜復以孔氏子弟充選英宗治平元年京東提刑王綱乞慎長



民之官詔勿以孔氏知仙源縣其襲封人如無親屬在鄉里令常任近便官不得遠去家廟徽宗崇寧三年勅文宣王之後常聽一人注仙源縣官令承簿尉無定職金熙宗皇統間仍改仙源爲曲阜章宗承安二年勅衍聖公年及十七許兼曲阜令不得別行差占元仁宗延祐三年衍聖公兼曲阜尹思誠以非嫡罷封爵專尹曲阜其子克欽孫希大皆世襲縣尹至明太祖洪武七年希大坐事罷職因改世襲爲世職令衍聖公保舉族人之賢者送部選授領勅赴任宣宗宣德九年停止給勅英宗天順間世職知縣年滿考績准加銜仍管縣事世宗嘉靖四十五年改令衍聖公選舉二人送撫按考試題授穆宗隆慶四年監察御史趙可懷以舉用非人民受其殃奏請世職知縣止支俸給專管林廟縣務以兗州府清軍同知駐縣管理五年六十四代衍聖公奏言林廟自有衍聖公主奉祀事又有管勾等官分理庶務世職知縣孔承厚當以冗員裁令致仕部議報可六年六月

神宗卽位詔復祖宗成法萬歷元年山東巡撫傅希摯巡按吳從憲等因奏言曲阜世職知縣乃國家世報先師之盛意邇緣舉用非人盡行裁革直有因咽廢食之病須復世職知縣方不違祖宗舊制但救弊補偏必酌定畫一之法方可經久以後選授先行提學道將三氏學廩膳生員考取四人送院院覆考取二人送部部再考取一人注授住劄舊城專管縣事不許干涉林廟有能誠心愛民才守俱優者照依流官一體陞擢若貪酷不職者聽撫按參劾既不管林廟與公府原無干涉不得徑自參論其同知革管縣務仍駐新城專司巡捕部議曲阜世職知縣乃國家優崇先聖之典止當慎擇其人不當并棄其法其請復世職及考選之法應如議行至同知駐劄新城帶管巡捕揆之體統殊有滯礙應令仍舊回府專管清軍事得旨允行四年從巡撫李世達巡按麻永吉請同流官一體朝覲嘉宗天啓六年撫按等言世職以孔氏廩生考選不便陞遷請改於舉監內考選

駐烈帝崇禎元年六十五代衍聖公又言世職用舉監不便仍照舊例於孔氏廩生內考選二年六十二代孫給事中聞詩奏准將部考選下之一人貢入國學著爲例

國朝順治元年山東巡撫方大猷題准照舊考選部議令衍聖公保舉題授雍正二年定議曲阜知縣缺出令衍聖公會同山東巡撫於孔氏合族中揀選才品優長堪任邑令者擬定正陪二人保送引

見

補授遇大計年分令衍聖公會同巡撫考核具題如有不職一例處

分乾隆六年復議曲阜縣知縣缺出令衍聖公於孔氏合族中進士舉貢生員擇其讀書立品素爲族黨推重者不拘人數咨送山東巡撫覆加考試聽該撫揀選正陪保送引

見

補授並令該撫與所屬州縣一體稽察二十一年署巡撫白鍾山奏

曲阜知縣一缺向由衍聖公保舉每多瞻顧營私若其人懦弱卽聽挾制若其人才幹則諸事阻撓如近日庇護廟佃等事其明徵也臣

請

皇上特頒諭旨將曲阜知縣一缺在外揀選調補不必拘用孔氏族人未始非玉成聖裔之一助奏上部議准行其見任知縣孔傳松令赴部以外省知縣另補奉

旨吏部議覆白鍾山所奏曲阜縣知縣改爲題缺一本闕里爲毓聖之鄉自唐宋以來率以聖裔領縣事夫大宗主噉旣已爵列上公而知縣一官專以民事爲職奉法令則以裁制傷恩厚族黨則以偏私廢事甚至因緣爲奸簠簋不飭者有之且亦非古人易地而官之道我國家尊崇先聖遠邁前朝廷恩後葉有加無已豈於此而有靳焉但與其循舊制而致瘼官有乖政體何如通變宜民俾吏舉其職民安其治於邑中黎庶孔氏族人均有裨益著照該部所議行其見任世職知縣旣已謝事若歸部改銓不過恩及其身而止於朕心猶有未愜著加恩授爲世襲六品官仍令揀選充補用副朕重道崇儒至意

復經部議世襲六品官歲給俸銀及遇有缺出揀選題補悉照執事官之例其由進士舉人充補者應選之年按原班銓選由貢生生員充補者准一體鄉試

孔庭族長一員掌申明家範表率宗族凡子弟有不率不若者教治之宋徽宗崇寧二年詔文宣王家選親族一人判司簿尉事卽以家長承襲此家長授官之始也後孔庭族長並授迪功郎明太祖洪武元年以翰林檢閱官孔涇齒行俱尊特令還鄉里爲孔氏族長面賜籐杖一枝令世守主領宗族事其後衍聖公擇年長行尊有德者爲之無品秩也至我

朝至聖廟設執事官族長率兼執事官

林廟舉事一員掌提領監修林廟佐家長之事宋真宗天禧五年詔於夫子後選差朝官一人監督孔廟工役時道輔以知仙源縣事充元時由省臣擇孔氏中廉幹者一人委充提領監修官依族長授八

品冠帶明初改稱孔庭族舉提領林廟事俱由衍聖公選委無品秩  
今亦如族長兼聖廟執事官

司樂一員正七品掌樂章樂器而教肄樂生元仁宗延祐六年五十  
四代衍聖公思晦請置明因之

國朝順治元年巡撫方大猷題准照舊由衍聖公保舉堪用生員咨  
部銓用

奎文閣典籍一員正七品掌奎文閣書籍及禮生元武宗至大二年  
五十四代衍聖公思晦以賜書甚多請照國子監例設典籍一員掌  
之經中書議准歷明迄

國朝俱由衍聖公保舉堪用人員同司樂一例題補

屯田管勾一員正七品掌祀田錢穀之出入祭祀則供其牲牷粢盛  
治膳饔醢醢之屬置設除授同典籍其屬有屯官八員鉅野鄆城平  
陽三屯各二員東阿獨山二屯各一員分掌五屯以供祀事初名屯

長由衍聖公揀選劄委後改屯官由衍聖公揀選咨領部劄任事

守衛林廟百戶一員秩比衛守備掌林廟之戶籍供其洒掃戶役之事主守禮器祭祀則司滌濯掌犧牲之宰割在漢魏卽百石卒史之職也漢桓帝元嘉三年魯相乙瑛嘗以孔子廟有禮器無人掌領請置百石卒史一人掌之後世以其管轄洒掃百戶其官遂爲百戶又以職司巡徼有武備焉合典籍司樂管勾等三員爲兵農禮樂四司始用孔氏後以生員明孝宗弘治開始以洒掃戶才德兼優者充之止由衍聖公委用不由部銓注

國朝康熙二十三年六十七代衍聖公奏准與司樂典籍管勾等官一體咨部題授食衛守備俸

知印一員掌書一員書寫一員並正七品掌公府文書印信掌書設自元成宗元貞二年知印書寫並明太祖洪武二年建皆由衍聖公保舉堪用人員咨部題補

國朝順治元年巡撫方大猷題准照舊銓用

奏差一員正七品掌齋衍聖公表箋章奏置設銓除同知印等官

隨朝伴官六員正七品凡朝覲則隨從辦事明太祖洪武十七年設選補如奏差等官初無常員遇朝覲輒除二人咨部給銜

國朝乾隆十五年經部咨查始額定六員遇缺乃補

述曰封建之制所以存王者後也昔武王下車而封先代之蔭故神農氏之後封於焦黃帝氏之後封於蓊堯之後封於祝舜之後封於陳夏之後封於杞殷之後封於宋降及漢唐興滅繼絕之典亦間有行者然而遠者千餘年近者或數十百載神明之胃越在草莽至今日而問古帝王遺封蓋鮮有存焉者矣孔子無尺寸之土而龍旂承祀作賓王家宗廟之美百官之富迄於今不廢於戲至盛矣

附考奉祀生司廟中奔走執事及先賢先儒祠墓之祭祀弘治十二年六十一代代襲衍聖公宏泰始揀選聖賢後裔俊秀者充補奉祀



生給以衣巾移提學註冊未定名額

國朝雍正四年禮部侍郎巴泰條奏始有定額其見有之奉祀生部  
議令衍聖公會同該撫學臣查明果係聖賢嫡裔地方實有祠宇報  
部換給印照嗣後遇有設立之奉祀生關衍聖公者令會同該撫學  
臣查核其人實係聖賢嫡裔地方實有祠宇咨部給照方准奉祀時  
查明聖賢後裔奉祀生孔氏一百六十五名顏子裔三十六名曾子  
裔十八名孟子裔二十三名閔子裔十二名端木子裔十二名仲子  
裔二十名冉子耕裔二名冉子雍裔三名宰子裔一名林子裔二名  
高子裔一名樊子裔一名曹子裔一名任子裔一名鄭子裔一名榮  
子裔一名周子裔二名張子載裔一名張子栻裔一名薛子裔一名  
胡子居仁裔一名周公裔東野氏十三名嗣於雍正八年增置南宮  
子裔奉祀生一名榮子裔一名九年增置言子裔奉祀生二名陳子  
亢裔卜子裔各一名十二年增置孔氏奉祀生一名曾子裔二名孟

子裔一名十三年增置孔氏奉祀生六名東野氏一名乾隆元年增置冉子耕裔奉祀生四名鄭子裔萬子裔各一名二年增置高子裔奉祀生二名東野氏三名三年增置孟子裔朱子裔奉祀生各二名閔子裔言子裔卜子裔任子裔公孫子裔各一名冉子雍裔三名東野氏六名四年增置孔氏奉祀生三名冉子雍裔二名司馬子裔薛子裔各一名六年增置孟子裔奉祀生八名有子裔澹臺子裔樊子裔各一名七年增置孟子裔奉祀生七名八年增置燕子裔奉祀生一名九年增置東野氏奉祀生六名十年增置冉子耕裔奉祀生三名東野氏二名十二年增置曾子裔奉祀生一名冉子耕裔言子裔各三名十三年增置孟子裔奉祀生二名十五年又增置三名十七年又增置二名又增置卜子裔奉祀生一名十八年增置曾子裔奉祀生一名孟子裔二名十九年又增置二名又增置左邱子裔奉祀生二名二十一年增置孟子裔奉祀生四名卜子裔東野氏各一名

二十三年增置孔氏奉祀生一名孟子裔二名二十四年又增置二名二十五年增置東野氏奉祀生二名已上奉祀生新舊額共四百三十六名

述曰奉祀生之設始不過由衍聖公及地方大吏揀選充補給冠服奉祠墓而已自改用部照遂有定員而當日彙冊之際尙漏張溫奉祀一人張溫者四十三代文宣公之外祖當孔末造亂之時微張氏則孔氏幾斬矣倘得白於部無廢舊典亦旌善酬恩之舉也

闕里文獻考卷十八終

闕里文獻考卷十九

禮第五之一

郊特牲曰禮之所尊尊其義也失其義陳其數祝史之事也故其數可陳也其義難知也荀卿亦曰不知其義謹守其數不敢損益父子相傳以持王公是官人百吏所以取祿秩也然則言禮而第求之器數之間抑亦末矣顧禮緣義起而情以文宣貴本親用兩者相合而先王之禮制行焉則籩豆之事亦不得盡委諸有司之職也况意本同原而制隨世變因革增損代有不同故當其用之之時典守者有其官行習者親其事其義或不及知而器數之末類能言之及時移世易數千百年以後往往義之難知者學士大夫或可稽典籍而得之而登降周旋之節儀章度數之繁蓋有沈湮漸滅而終不可復舉者禮之亡也器數先之此古人所爲悼歎於無窮也闕里爲秉禮之國聖澤雖微而儀章未泯王者資禮樂焉昔太史公作史記云適魯

觀仲尼廟堂車服禮器諸生以時習禮其家漢高帝采古禮起朝儀亦嘗使叔孫通徵魯諸生爲之今雖士不古若抱殘守闕習其儀而未盡通其意者蓋誠有之然往者伏睹我

皇上十三年春時巡東土

駐駕廟庭周覽古物慨有更革禮器之意遂於

迴鑾之日

命工繪式製造而

郊

廟壇壝籩豆尊罍簠簋之制悉復古初禮失而求諸野則闕里亦後世徵文獻之所也乃舊志所載除封諡章服祀典樂章外雖有禮器樂器二圖不過略指其名義而已儀注未登象數多缺恐非所以布方策昭來許也今封諡祀典已另爲一帙而於器數儀文復徵之往古驗之今時作爲禮樂二考以俟愛素好古者採擇焉按禮之宜考者

一曰儀注二曰祭品三曰祭器儀注之目有八一曰四仲釋奠儀二曰月朔釋菜儀三曰歲時常祭儀四曰月望行香儀五曰告祭儀六曰祭中興祖儀七曰書院釋奠儀八曰春秋掃墓儀

### 皇帝釋奠及

遣告諸儀不常舉者則另見焉考釋奠之禮古有行於山川者有行於廟社者有行於學者周禮太祝大會同造於廟宜於社過大山川則用事焉反行舍奠旬祝舍奠於祖廟禘亦如之此行於山川廟社者也王制反釋奠於學及文王世子之所云釋奠皆行於學者也但山川廟社舉無常時故賈公彥曰非時而祭曰奠又曰奠之爲言停停饌具而已鄭氏亦謂釋奠設薦饌酌奠無迎尸以下事若學之釋奠自始立學及訊馘外則舉有常期又其制有牲幣有合樂有獻酬必三者具而其禮斯備鄭氏以王制之釋奠爲釋菜奠幣以文王世子之釋奠者必有合謂與鄰國合其說皆非也秦漢以降其制無聞至

唐宋而釋奠之名遂專施於學其禮亦備舉焉今闕里釋奠用四仲  
上丁前期三日書寫官恭繕祝版陳衍聖公視事廳正中大成殿祝  
文曰維乾隆年月日幾十幾代孫襲封衍聖公某等敢昭告於至聖  
先師曰惟祖德配天地道冠古今刪述六經垂憲萬年茲惟仲夏謹  
以牲帛醴齊粢盛庶品式陳明薦配以復聖顏子宗聖曾子述聖三  
世祖亞聖孟子尚饗崇聖祠祝文曰維乾隆年月日主鬯裔孫襲封  
衍聖公某等敢昭告於肇聖王裕聖王衍聖王昌聖王啓聖王曰惟  
王誕生至聖爲萬世王者師功德顯著茲惟仲夏謹以庶品之儀致  
祭配以先賢顏氏先賢曾氏先賢二世祖先賢孟孫氏尚饗啓聖祠  
祝文曰維乾隆年月日主鬯裔孫襲封衍聖公某等敢昭告於啓聖  
王曰茲遇仲夏仲夏式遵舊章用薦祀事尚饗家廟祝文曰維乾隆年月  
日幾十幾代孫襲封衍聖公某等敢昭告於始祖考妣二世祖考妣  
三世祖考妣中興祖考妣曰茲遇仲夏仲夏式遵舊章用薦祀事尚饗卓

午行聖公具公服北向恭閱訖書寫官捧安亭內同香帛由快睹門  
送入廟恭安奎文閣下遂分署執事榜於廟庭大成殿至聖先師及  
四配位前行聖公主壇寢殿分獻官一員十二哲分獻官二員東西  
廡從祀先賢先儒分獻官六員監祭官二員太祝官一員太史官一  
員司香官五員司帛官五員司爵官五員司尊官一員糾儀官二員  
兩階頌班官二員典儀官一員典樂官一員掌宰官一員司膳官一  
員司織官一員巡綽官二員崇聖祠攝獻官一員從祀分獻官二員  
監祭官一員糾儀官一員啓聖祠攝獻官一員寢殿分獻官一員監  
祭官一員糾儀官一員家廟攝獻官一員監祭官一員糾儀官一員  
后土祠主祭官一員崇聖祠攝獻官以世襲六品官掌宰以百戶司膳  
以管勾典儀以典籍典樂以司樂司織巡綽皆以伴官其餘分獻及  
各執事皆以廟庭執事官及敎職等又進奉祀生執事樂舞生及四  
氏學生而分其執事十二哲司香二人司帛二人司爵二人司尊二



人兩廡司香六人司帛六人司爵六人司尊六人寢殿司香一人司帛一人司爵一人司尊一人崇聖祠太祝一人太史一人司香十一人司帛十一人司爵十一人司尊三人啓聖祠太祝一人太史一人司香一人司帛一人司爵一人司尊一人啓聖寢殿司香一人司帛一人司爵一人司尊一人家廟太祝一人太史一人司香四人司帛四人司爵四人司尊一人后土祠司香一人司帛一人司爵一人司尊一人凡一百三人典籍召集禮生而分其執事大成殿鳴贊二人衍聖公引贊一人對引一人分獻各官引贊八人相禮十八人陳設八人寢殿鳴贊一人引贊一人對引一人相禮二人陳設一人崇聖祠鳴贊一人引贊三人對引一人相禮六人陳設一人啓聖祠鳴贊一人引贊一人對引一人相禮二人陳設一人啓聖寢殿鳴贊一人引贊一人對引一人相禮二人陳設一人家廟鳴贊一人引贊一人對引一人相禮二人陳設一人后土祠鳴贊一人引贊一人對引一人

人相禮二人陳設一人凡八十人司樂召集樂舞生而分其執事麾  
二人歌六人琴六人瑟四人笙六人洞簫六人笛六人鳳簫二人塤  
二人箎四人編鐘一人副一人編磬一人副一人楹鼓一人副一人  
足鼓一人副一人搏拊二人鼗鼓二人相鼓二人祝一人敔一人旌  
二人文舞三十六人領班二人鐘鼓六人引導樂十四人凡百二十  
人灑掃陳設守衛百戶供其戶丁庖丁廚役取辦於簪勾分署執事  
既定凡官員學生及宗族人等無執事者皆陪祭乃戒誓設戒誓牌  
同文門下南向衍聖公率攝獻分獻官執事官生陪祭官生宗族人  
等具公服入快睹門揖至同文門前鳴贊唱排班齊唱跪叩興衍  
聖公以下行一跪三叩禮興鳴贊唱讀戒誓鳴鐘鼓戒誓生恭捧戒  
牌西向讀曰欽遵

皇帝令典於某月某日丁某祗行釋奠禮於至聖先師孔子廟庭官買  
師生宗族執事人等自今日爲始沐浴更衣散齋一日各宿別室不

飲酒不茹葷不弔喪不問疾不聽音樂不理刑名致齊一日同宿齊  
所思神飲食思神居處思神笑語思神志意思神所樂思神所嗜各  
宜精白乃心益加敬謹戒之哉讀畢捧牌安原處鳴贊唱讀誓詞戒  
誓生恭捧誓牌西向讀曰

國有常憲明神鑒焉讀畢捧牌安原處鳴贊唱懸戒牌戒誓生捧牌  
恭懸同文門下鳴贊唱給齊牌凡與祭官生領齊牌訖鳴贊唱設誓  
牌戒誓生捧牌置案昇起引導樂作鳴鐘鼓設誓牌大中門下正中  
翼日當祭之前期二日衍聖公致齊於齊宿所典籍集禮生於詩禮  
堂守衛百戶出禮器禮生滌濯之陳於堂上司樂集樂舞生於金絲  
堂出樂器樂舞生拂拭之陳於堂上行聖公率攝獻分獻及執事各  
官具公服恭詣觀禮聽樂祭前一日質明管勾官陳棗盛快睹門外  
陳犧牲仰高門外衍聖公率攝獻分獻及執事各官具公服迎棗盛  
歸神廚迎犧牲歸神庖引導皆用樂是日設至聖先師四配十二哲

虛位於奎文閣東廡三壇西廡三壇在同文門左右東西相向陳尊  
彝轉洗樂懸綴兆如祭儀寢殿虛位設奎文閣後崇聖祠虛位設同  
文門東家廟虛位在其後啓聖祠虛位設同文門西寢殿虛位在其  
後后土祠虛位設奎文閣後之左亦各陳尊俎如祭儀衍聖公具公  
服率攝獻分獻官及執事官生陪祭官生宗族人等就位習儀既畢  
少憩恭詣神庖省牲掌宰官取血特率各壇陳設禮生捧毛血盤恭  
安各祭案上行聖公以下遂詣神廟視膳司膳官率各壇陳設禮生  
捧饌盤恭安各祭案左引導皆有樂是時乘盛饌豐牲脍告備禮樂  
諸生成集乃陳設大成殿至聖先師孔子位前獻爵三帛篚一香盒  
一毛血盤一饌盤一盞一鉶二簋二饌十豆十牛一羊一豕一  
共俎太尊一犧尊一象尊一山尊一雷尊一簋尊三彝一牢一茅沙  
池一香鼎一燭臺四花瓶四香盤一香盒一福爵一胙盤一鬯一洗  
一燭爐一四配位各獻爵三帛篚一香盒一毛血盤一饌盤一鉶二

簋二簋二籩八豆八羊一豕一兩俎香鼎一燭臺二東哲六位各供  
爵一鉶一簋一簋一籩四豆四共獻爵三帛篚一香盒一毛血盤一  
饌盤一羊一豕一兩俎壺尊一香鼎一燭臺二樽一洗一西哲同兩  
廡共五十六壇各供爵一簋一籩一籩一籩四豆四香鼎一燭臺二分獻  
六處各獻爵三帛篚一香盒一毛血盤一饌盤一羊一豕一兩俎壺  
尊一香鼎一壺一洗一寢殿至聖先師孔子夫人位前獻爵三帛篚  
一香盒一毛血盤一饌盤一鉶二簋二簋二籩八豆八羊一豕一兩  
俎壺尊一香鼎一燭臺二樽一洗一崇聖祠肇聖王裕聖王詒聖王  
昌聖王啓聖王位前各獻爵三帛篚一香盒一毛血盤一饌盤一鉶  
二簋二簋二籩八豆八羊一豕一兩俎香鼎一燭臺二共壺尊一彝  
一竿一茅沙池一福爵一胖盤一樽一洗一燔爐一東配二位各獻  
爵三帛篚一香盒一鉶一簋一簋一籩一籩四豆四香鼎一其毛血盤一  
饌盤一羊一豕一兩俎燭臺二西配同從祀左右各一壇各獻爵三

帛篚一香盒一毛血盤一饌盤一簋一簋一籩四豆四羊三體豕三  
體兩俎壺尊一香鼎一燭臺二蠭一洗一啓聖祠啓聖王位前獻爵  
三帛篚一香盒一毛血盤一饌盤一釧二簋二簋二籩八豆八羊一  
豕一兩俎壺尊一香鼎一燭臺二彝一罍一茅沙池一福爵一胙盤  
一罍一洗一燭爐一寢殿啓聖王夫人位前獻爵三帛篚一香盒一  
毛血盤一饌盤一釧二簋二簋二籩八豆八羊一豕一兩俎壺尊一  
香鼎一燭臺二蠭一洗一家廟始祖考妣位前供爵二獻爵三帛篚  
一香盒一毛血盤一饌盤一登一釧二簋二簋二籩十豆十羊一豕  
一兩俎香鼎一燭臺二世祖考妣三世祖考妣位前各供爵二獻  
爵三帛篚一香盒一毛血盤一饌盤一釧二簋二簋二籩八豆八羊  
一豕一兩俎香鼎一燭臺二中興祖考妣位前供爵三獻爵三帛篚  
一香盒一毛血盤一饌盤一釧一簋一簋一籩四豆四羊一豕一兩  
俎香鼎一燭臺二四壇共壺尊一福爵一胙盤一罍一洗一后土祠

獻爵三帛篚一香盒一毛血盤一饌盤一簋一簋一籩四豆豕首  
一壺尊一香鼎一燭臺二壘一洗一右祭器之數凡供爵七十七獻  
爵九十六篚三十二登三鉶四十九簋二百有八籩二百有八籩四  
百三十六豆四百三十六饌盤三十毛血盤三十俎五十七香鼎八  
十八香盒三十三香盤一花瓶四燭臺一百六十二太尊一犧尊一  
象尊一山尊一雷尊一著尊三壺尊十六簋三罍三茅沙池三燭爐  
三福爵四胙盤四壘十七洗十七巾十七祭案七十八祝案四福胙  
案四凡登鉶簠簋簠豆皆陳於祭案後在中鉶次之簋在鉶左簋在  
鉶右籩又在籩之左豆又在豆之右大成殿香鼎燭臺花瓶太尊犧  
尊象尊山尊雷尊陳設如常張曲柄黃蓋於殿門外兩楹間祝案陳  
祭案西南福胙案陳祭案東南牲俎陳祭案前三著尊共案在殿門  
外左西向兩壺尊分案在殿東西兩牖外相向燭爐設大成殿簷下  
正中陳陳杏壇南香盤前有几茅沙池在几前彝在東偏亦有几壘

洗在東階下陛之南直東甬分獻東哲疊洗次之西哲疊洗在西階下直西甬洗有架疊有案獻爵帛篚陳焉兩廡壺尊各在其廡門外之左東廡北向西廡南向爵篚疊洗在其階下中和韶樂陳露臺上引導樂陳大成門外鼗鼓鏞鐘在杏壇上植庭燎夾兩陛閒衍聖公拜位在彝屏前寢殿分獻官東西哲分獻官兩廡分獻官各拜位次之陪祭官員族人拜位列兩階下監祭官立殿門內東西相向典儀典樂官立露臺上西向司膳掌宰官立露臺上東向糾儀官立兩班上東西相向鳴贊在露臺午階上西向崇聖啓聖兩祠大成啓聖兩寢及家廟堂上堂下設尊俎疊洗及攝獻分獻監祭糾儀各官之位亦略如大成殿之儀詩禮堂正中設祝案四皆南向東設署名案一西向鼗鼓初嚴太祝官生恭捧祝版詣詩禮堂安案上鼗鼓三嚴衍聖公具朝服恭詣詩禮堂以次署名訖太祝官生恭捧分詣各壇安祝案上衍聖公以下皆序揖引贊贊請行禮導引衍聖公出詩禮堂



入金聲門至拜位旁立鳴贊唱啓戶掃除凡殿上執事各官皆趨簷下不鳴贊行一跪三叩頭禮興各就位立樂舞生各執羽籥簫管拱立兩階下鳴贊唱樂舞生就位樂舞生夾兩階升各就位擊鼓鼓爲節鳴贊唱執事者各司其事陪祭官就位分獻官就位正獻官就位引贊引衍聖公就拜位北而立鳴贊唱瘞毛血掌宰官詣至聖先師位前一叩頭興恭捧毛血盤由殿中門出配位以下陳設生亦各詣位前一叩頭興恭捧毛血盤出瘞於瘞所鳴贊唱迎神祝史降詣杏壇前裸所取盥酌酒衍聖公跪受盥濯地奠畢行一叩頭禮興祝史出大成門外引導樂作入大成門杏壇鳴鐘鼓衍聖公以下皆退立階東西向跪迎候過復位引導樂止鳴贊唱參神麾生唱樂奏昭平之章樂作鳴贊唱跪叩興衍聖公以下行三跪九叩頭禮興樂闌鳴贊唱奠帛行初獻禮麾生唱樂奏宣平之章樂作有舞引贊贊詣盥洗所盥手相禮生進洗衍聖公盥手引贊贊進巾相禮生進巾衍聖

公拭手引贊贊洗爵捧爵官進爵衍聖公洗爵引贊贊進巾相禮生  
進巾衍聖公拭爵引贊贊酌酒尊所司尊者舉爵酌酒司尊官酌訖  
引贊贊詣始祖至聖先師神位前帛爵由殿中門入捧帛官立案前  
左捧爵官立案側左四配帛爵各在供案南北向神位立衍聖公由  
殿左門入立香案前引贊贊進香司香官跪進香引贊贊上香衍聖  
公受香恭執爐內引贊贊跪叩興衍聖公行一叩頭禮興引贊贊進  
帛捧帛官跪進帛引贊贊奠帛衍聖公受帛恭奠案前正中引贊贊  
進爵司爵官跪進爵引贊贊獻爵衍聖公受爵恭獻案上正中拈上  
就案左不贊行一叩頭禮興引贊贊詣讀祝位跪衍聖公跪鳴贊唱  
皆跪分獻官以下皆跪塵生假座樂止文舞生皆跪引贊贊讀祝太  
祝官詣祝案前跪三叩頭捧祝版恭讀畢捧祝版興恭安至聖先師  
位前僊內就案右三叩頭退文舞生興塵生舉麾樂作引贊贊叩興  
衍聖公行三叩頭禮興鳴贊唱叩興分獻官以下隨行三叩頭禮興

引贊引衍聖公詣復聖顏子宗聖曾子述聖三世祖亞聖孟子各位  
前上香獻帛爵並如正位儀既讀祝後鳴贊唱行分獻禮引贊引寢  
殿分獻官詣寢殿行禮三獻既畢乃復原位餘引贊引東西哲兩廡  
分獻官各盥手洗爵升壇上香獻帛爵如前儀並俟衍聖公獻亞聖  
孟子時同分獻獻畢引贊贊復位衍聖公率分獻官至殿右門內兩  
廡分獻官各在其廡門內皆一揖出降階復位樂闕鳴贊唱行亞獻  
禮廡生唱樂奏秩平之章樂作有舞引贊贊詣盥洗所洗爵相禮生  
進洗捧爵官進爵衍聖公洗爵引贊贊進巾相禮生進巾衍聖公拭  
爵引贊贊詣酒尊所司尊者舉爵酌酒司尊官酌訖引贊贊詣始祖  
至聖先師神位前跪叩興衍聖公行一叩頭禮興引贊贊進爵捧爵  
官跪進爵引贊贊獻爵衍聖公受爵恭奠案左站上就案左不贊行  
一叩頭禮興引贊引衍聖公詣復聖顏子宗聖曾子述聖三世祖亞  
聖孟子各位前獻爵如正位儀既獻正位鳴贊唱行分獻禮引贊贊

引分獻官各洗爵登獻如初獻儀獻畢引贊贊復位衍聖公率分獻  
官揖出復位樂闋鳴贊唱行終獻禮麾生唱樂奏絃平之章樂作有  
舞引贊引衍聖公及分獻官洗爵登獻如亞獻儀爵奠案右玷上獻  
畢復位樂闋旌生引舞生退立樂懸外鳴贊唱飲福受胙引贊引衍  
聖公升殿贊詣福胙位跪衍聖公跪鳴贊唱皆跪分獻官以下皆跪  
時寢殿分獻官已歸班行禮引贊贊飲福太祝官跪授福爵衍聖公  
受爵三飲以虛爵授太祝官太祝官受興復於玷引贊贊受福胙陳  
設生跪授胙衍聖公受胙仍授陳設生陳設生受興捧出俟禮畢歸  
胙引贊贊叩興衍聖公行三叩頭禮興鳴贊唱叩興分獻官以下隨  
行三叩頭禮興引贊贊復位衍聖公揖出復位鳴贊唱跪叩興衍聖  
公以下行三跪九叩頭禮興鳴贊唱徹饌麾生唱樂奏懿平之章樂  
作司膳官詣至聖先師位前一叩頭興恭捧饌盤由殿中門出配位  
以下陳設生亦各詣位前一叩頭興恭捧饌盤出瘞於瘞所鳴贊唱

送神麾生唱樂奏德平之章樂作鳴贊唱跪叩興衍聖公以下行三  
跪九叩頭禮興樂闕大成殿簷下引導樂作由中階降杏壇鳴鐘鼓  
衍聖公以下退立階西東向跪送候出大成門復位鳴贊唱讀祝者  
捧祝進帛者捧帛恭詣燎位樂疊奏德平之章麾生不唱樂作太祝  
官捧帛官及捧帛生各詣案前三叩頭興捧祝帛並由殿中門出恭  
送詣燎所引贊贊詣望燎位引衍聖公率分獻官詣望燎位引贊贊  
望燎祝帛焚畢引贊贊復位衍聖公率分獻官復位樂闕鳴贊唱禮  
畢杏壇鳴鐘衍聖公以下皆退樂舞生捲班仍應杏壇鼓節禮生樂  
生合列杏壇前行一跪三叩頭禮退旦日乃頒胙散福寢殿儀引贊  
引分獻官至拜位前北向立鳴贊唱啓戶掃除瘞毛血陳設生詣神  
案前一叩頭興捧毛血盤由殿中門出瘞於瘞所鳴贊唱迎神跪叩  
興分獻官行二跪六叩頭禮興鳴贊唱奠帛行初獻禮引贊贊詣盥  
洗所盥手相禮生進洗分獻官盥手引贊贊進巾相禮生進巾分獻

官拭手引贊贊洗爵捧爵生進爵分獻官洗爵引贊贊進巾相禮生  
進巾分獻官拭爵引贊贊詣酒尊所司尊者舉簋酌酒司尊生酌訖  
引贊贊詣始祖妣夫人神位前帛爵由殿中門入捧帛生立案前左  
捧爵生立案側左分獻官由殿左門入立香案前引贊贊進香司香  
生跪進香引贊贊上香分獻官受香恭焚鑪內引贊贊跪叩興分獻  
官行一叩頭禮興引贊贊進帛捧帛生跪進帛引贊贊奠帛分獻官  
受帛恭奠案前正中引贊贊進爵捧爵生跪進爵引贊贊獻爵分獻  
官受爵恭獻案上正中站上就案左不贊行一叩頭禮興引贊贊復  
位分獻官至殿右門向上揖出復位鳴贊唱行亞獻禮引贊贊詣盥  
洗所洗爵相禮生進洗捧爵生進爵分獻官洗爵引贊贊進巾相禮  
生進巾分獻官拭爵引贊贊詣酒尊所司尊者舉簋酌酒司尊生酌  
訖引贊贊詣始祖妣夫人神位前跪叩興分獻官行一叩頭禮興引  
贊贊進爵捧爵生跪進爵引贊贊獻爵分獻官受爵恭奠案左站上

就案左不贊行一叩頭禮興引贊贊復位分獻官揖出復位鳴贊唱  
行終獻禮引贊引分獻官洗爵登獻如亞獻儀爵奠案右玷上三獻  
畢鳴贊唱徹饌陳設生詣案前一叩頭興恭捧饌盤由殿中門出瘞  
於瘞所鳴贊唱送神跪叩興分獻官行二跪六叩頭禮興鳴贊唱禮  
畢引贊贊復位分獻官復大成殿前原位隨班行禮俟大成殿焚帛  
時司帛生詣位前一叩頭興恭捧帛由殿中門出隨詣燎位分獻官  
隨衍聖公後詣燎所望燎崇聖祠儀大成殿釋奠時攝獻官同分獻  
官恭詣崇聖祠拜位前立鳴贊唱啓戶掃除分獻官就位攝獻官就  
位攝獻分獻官各就位立鳴贊唱瘞毛血各陳設生詣各神案前一  
叩頭興捧毛血盤由殿中門出瘞於瘞所鳴贊唱迎神祝史降階詣  
裸所取盥酌酒攝獻官跪受畢灌地奠畢行一叩頭禮興鳴贊唱參  
神跪叩興攝獻官等行二跪六叩頭禮興鳴贊唱奠帛行初獻禮引  
贊贊詣盥洗所盥洗手相禮生進洗攝獻官盥手引贊贊進巾相禮生

進巾攝獻官拭手引贊贊洗爵捧爵生進爵攝獻官洗爵引贊贊進巾相禮生進巾攝獻官拭爵引贊贊詣酒尊所司尊者舉爵酌酒司尊生酌訖引贊贊詣聖王神位前帛爵由殿中門入捧帛生立各案前左捧爵生立各案側左攝獻官由殿左門入立香案前引贊贊進香司香生跪進香引贊贊上香攝獻官受香恭焚爐內引贊贊跪叩興攝獻官行一叩頭禮興引贊贊進帛捧帛生跪進帛引贊贊奠帛攝獻官受帛恭奠案前正中引贊贊進爵捧爵生跪進爵引贊贊獻爵攝獻官受爵恭奠案上正中拈上就案左不贊行一叩頭禮興引贊引攝獻官詣裕聖王神位前次詣詒聖王昌聖王啓聖王各神位前上香奠帛爵如肇聖王儀引贊贊詣讀祝位跪攝獻官跪鳴贊唱皆跪分獻官皆跪引贊贊讀祝太祝生詣祝案前跪三叩頭捧祝版恭讀畢捧祝版興恭安正位筐內三叩頭退引贊贊叩興攝獻官行三叩頭禮興鳴贊唱叩興分獻官隨行三叩頭禮興引贊引攝獻



官詣先賢顏氏先賢曾氏先賢二世祖先賢孟孫氏各位前並上香奠帛爵如前儀既讀祝後鳴贊唱行分獻禮引贊引左右從祀分獻官盥手洗爵升殿上香奠帛爵如攝獻官儀並俟攝獻官獻先賢孟孫氏時同分獻獻畢引贊贊復位攝獻官分獻官至殿右門揖出降階復位鳴贊唱行亞獻禮引贊贊詣盥洗所洗爵相禮生進洗捧爵生進爵攝獻官洗爵引贊贊進巾相禮生進巾攝獻官拭爵引贊贊詣酒尊所司尊者舉羣酌酒司尊生酌訖引贊贊詣肇聖王神位前跪叩興攝獻官行一叩頭禮興引贊贊進爵捧爵生跪進爵引贊贊獻爵攝獻官受爵恭奠案左玷上就案左不贊行一叩頭禮興引贊贊詣裕聖王神位前次詣詒聖王昌聖王啓聖王及先賢顏氏先賢曾氏先賢二世祖先賢孟孫氏各位前並獻爵如肇聖王位前儀獻五王畢鳴贊唱行分獻禮引贊引左右從祀分獻官洗爵登獻如前儀獻畢揖出復位鳴贊唱行終獻禮引贊引攝獻官分獻官洗爵登

獻如亞獻儀奠奠案右坫上三獻畢鳴贊唱飲福受胙引贊引攝獻  
官升殿贊詣福胙位跪攝獻官跪鳴贊唱皆跪分獻官皆跪引贊贊  
飲福酒太祝生跪授福爵攝獻官受爵三飲以虛爵授太祝生太祝  
生受興復於坫引贊贊受福胙陳設生跪授胙攝獻官受胙仍授陳  
設生陳設生受興捧出俟禮畢歸胙引贊贊叩興攝獻官行三叩頭  
禮興鳴贊唱叩興分獻官隨行三叩頭禮興引贊贊復位攝獻官揖  
出復位鳴贊唱跪叩興攝獻官等行二跪六叩頭禮興鳴贊唱徹饌  
陳設生詣各案前一叩頭興恭捧饌盤由殿中門出瘞於瘞所鳴贊  
唱送神跪叩興攝獻官行二跪六叩頭禮興鳴贊唱讀祝者捧祝進  
帛者捧帛恭詣燎位太祝生捧帛生各詣案前三叩頭興捧祝帛由  
殿中門出恭送詣燎所引贊贊詣望燎位攝獻官分獻官詣望燎位  
引贊贊望燎祝帛焚畢引贊贊復位攝獻官等復位鳴贊唱禮畢攝  
獻官等皆退啓聖祠儀大成殿釋奠時攝獻官同分獻官恭詣啓聖

祠拜位前立鳴贊唱啓戶掃除分獻官就位攝獻官就位攝獻分獻  
官各就位立鳴贊唱瘞毛血陳設生詣神案前一叩頭興捧毛血盤  
由殿中門出瘞於瘞所鳴贊唱迎神祝史降階詣裸所取牢酌酒攝  
獻官跪受畢灌地奠畢行一叩頭禮興鳴贊唱參神跪叩興攝獻官  
等行二跪六叩頭禮興鳴贊唱奠帛行初獻禮引贊贊詣盥洗所盥  
手相禮生進洗攝獻官盥手引贊贊進巾相禮生進巾攝獻官拭手  
引贊贊洗爵捧爵生進爵攝獻官洗爵引贊贊進巾相禮生進巾攝  
獻官拭爵引贊贊詣酒尊所司尊者舉簋酌酒司尊生酌訖引贊贊  
詣啓聖王神位前帛爵由殿中門入捧帛生立案前左捧爵生立案  
側左攝獻官由殿左門入立香案前引贊贊進香司香生跪進香引  
贊贊上香攝獻官受香恭熱鑪內引贊贊跪叩興攝獻官行一叩頭  
禮興引贊贊進帛捧帛生跪進帛引贊贊奠帛攝獻官受帛恭奠案  
前正中引贊贊進爵捧爵生跪進爵引贊贊獻爵攝獻官受爵恭奠

案上正中帖上就案左不贊行一叩頭禮興引贊贊詣讀祝位跪攝  
獻官跪鳴贊唱跪分獻官跪引贊贊讀祝太祝生詣祝案前跪三叩  
頭捧祝版恭讀畢捧祝版興恭安篋內三叩頭退引贊贊叩興攝獻  
官行三叩頭禮興鳴贊唱叩興分獻官隨行三叩頭禮興鳴贊唱行  
分獻禮引贊引分獻官詣寢殿行禮引贊贊復位攝獻官至殿右門  
揖出復位鳴贊唱行亞獻禮引贊贊詣盥洗所洗爵相禮生進洗捧  
爵生進爵攝獻官洗爵引贊贊進巾相禮生進巾攝獻官拭爵引贊  
贊詣酒尊所司尊者舉爵酌酒司尊生酌訖引贊贊詣啓聖王神位  
前跪叩興攝獻官行一叩頭禮興引贊贊進爵捧爵生跪進爵引贊  
贊獻爵攝獻官受爵恭奠案左帖上就案左不贊行一叩頭禮興引  
贊贊復位攝獻官揖出復位鳴贊唱行終獻禮引贊引攝獻官洗爵  
登獻如亞獻儀爵奠案右帖上三獻畢鳴贊唱飲福受胙引贊引攝  
獻官升殿贊詣福胙位跪攝獻官跪引贊贊飲福酒太祝生跪授福

爵攝獻官受爵三飲以虛爵授太祝生太祝生受興復於坫引贊贊  
受福胙陳設生跪授胙攝獻官受胙仍授陳設生陳設生受興捧出  
俟禮畢歸胙引贊贊叩興攝獻官行三叩頭禮興引贊贊復位攝獻  
官揖出復位鳴贊唱跪叩興攝獻官行二跪六叩頭禮興鳴贊唱徹  
饌陳設生詣案前一叩頭興恭捧饌盤由殿中門出瘞於瘞所鳴贊  
唱送神跪叩興攝獻官行二跪六叩頭禮興鳴贊唱讀祝者捧祝進  
帛者捧帛恭詣燎位太祝生捧帛生各詣案前三叩頭興捧祝帛由  
殿中門出恭送詣燎所引贊贊詣望燎位攝獻官詣望燎位引贊贊  
望燎祝帛焚畢引贊贊復位攝獻官復位鳴贊唱禮畢乃退啓聖寢  
殿儀引贊引分獻官至拜位前北向立鳴贊唱啓戶掃除瘞毛血陳  
設生詣神案前一叩頭興捧毛血盤由殿中門出瘞於瘞所鳴贊唱  
迎神跪叩興分獻官行二跪六叩頭禮興鳴贊唱奠帛行初獻禮引  
贊贊詣盥洗所盥洗手相禮生進洗分獻官盥洗手引贊贊進巾相禮生

進巾分獻官拭手引贊贊洗爵捧爵生進爵分獻官洗爵引贊贊進巾相禮生進巾分獻官拭爵引贊贊詣酒尊所司尊者舉幕酌酒司尊者酌訖引贊贊詣啓聖王夫人神位前帛爵由殿中門入捧帛生立案前左捧爵生立案側左分獻官由殿左門入引贊贊進香司香生跪進香引贊贊上香分獻官受香恭熱爐內引贊贊跪叩與分獻官行一叩頭禮興引贊贊進帛捧帛生跪進帛引贊贊奠帛分獻官受帛恭奠案前正中引贊贊進爵捧爵生跪進爵引贊贊獻爵分獻官受爵恭獻案上正中玷上就案左不贊行一叩頭禮興引贊贊復位分獻官至殿右門揖出復位鳴贊唱行亞獻禮引贊贊詣盥洗所洗爵相禮生進洗捧爵生進爵分獻官洗爵引贊贊進巾相禮生進巾分獻官拭爵引贊贊詣酒尊所司尊者舉幕酌酒司尊者酌訖引贊贊詣啓聖王夫人神位前跪叩與分獻官行一叩頭禮興引贊贊進爵捧爵生跪進爵引贊贊獻爵分獻官受爵恭奠案左玷上就案

左不贊行一叩頭禮興引贊贊復位分獻官揖出復位鳴贊唱行終獻禮引贊引分獻官洗爵登獻如亞獻儀爵奠案右玷上三獻畢鳴贊唱徹饌陳設生詣案前一叩頭興恭捧饌盤由殿中門出瘞於瘞所鳴贊唱送神跪叩興分獻官行二跪六叩頭禮興鳴贊唱進帛者捧帛恭詣燎所捧帛生詣案前一叩頭興捧帛由殿中門出恭送詣燎所引贊贊詣望燎位分獻官詣望燎位引贊贊望燎帛焚畢引贊贊復位分獻官復位鳴贊唱禮畢乃退舊儀禮畢當前殿三獻後分獻官仍歸原班隨行禮如大成寢殿分獻官儀今既遷四配及從祀神主於崇聖祠前殿禮簡早畢寢殿分獻官不復歸原班家廟儀大成殿釋奠時攝獻官恭詣家廟拜位前立鳴贊唱啓戶掃除瘞毛血陳設生詣各神案前一叩頭興捧毛血盤由祠堂中門出瘞於瘞所引贊贊升壇攝獻官升階引贊贊詣始祖考妣神位前攝獻官由祠堂左門入立香案前引贊贊跪攝獻官跪引贊贊啓櫝出主陳設生

啓櫝出主引贊贊進香司香生跪進香引贊贊上香攝獻官受香恭  
熱爐內引贊贊叩興攝獻官行一叩頭禮興引贊引攝獻官以次詣  
二世祖考妣三世祖考妣中興祖考妣各神位前並啓櫝上香如始  
祖考妣位前儀引贊贊復位攝獻官至祠堂右門揖出復位鳴贊唱  
迎神跪叩興攝獻官行三跪九叩頭禮興鳴贊唱奠帛行初獻禮引  
贊贊詣盥洗所盥手相禮生進洗攝獻官盥手引贊贊進巾相禮生  
進巾攝獻官拭手引贊贊洗爵捧爵生進爵攝獻官洗爵引贊贊進  
巾相禮生進巾攝獻官拭爵引贊贊詣酒尊所司尊者舉爵酌酒司  
尊生酌訖引贊贊詣始祖考妣神位前帛爵由祠堂中門入捧帛生  
捧爵生以次立案前左攝獻官由祠堂左門入立香案前引贊贊跪  
攝獻官跪引贊贊進帛捧帛生跪進帛引贊贊奠帛攝獻官受帛拱  
舉授捧帛生捧帛生受興恭奠案前正中引贊贊進爵捧爵生跪進  
爵引贊贊獻爵攝獻官受爵拱舉授捧爵生捧爵生受興恭奠案上



正中玷上引贊贊叩興攝獻官行一叩頭禮興引贊引攝獻官以次詣二世祖考妣三世祖考妣中興祖考妣各神位前並奠帛爵如正位儀獻畢引贊贊詣讀祝位跪攝獻官跪引贊贊讀祝太祝生詣祝案前跪三叩頭捧祝版恭讀畢捧祝版興恭安正位篚內三叩頭退引贊贊叩興攝獻官行三叩頭禮興引贊贊復位攝獻官揖出復位鳴贊唱行亞獻禮引贊贊詣盥洗所洗爵相禮生進洗捧爵生進爵攝獻官洗爵引贊贊進巾相禮生進巾攝獻官拭爵引贊贊詣酒尊所司尊者舉爵酌酒司尊生酌訖引贊贊詣始祖考妣神位前跪攝獻官跪引贊贊進爵捧爵生跪進爵攝獻官受爵拱舉授捧爵生捧爵生受興恭奠案左玷上引贊贊叩興攝獻官行一叩頭禮興引贊引攝獻官以次詣二世祖考妣三世祖考妣中興祖考妣各神位前並獻爵如正位儀獻畢引贊贊復位攝獻官揖出復位鳴贊唱行終獻禮引贊引攝獻官洗爵登獻如亞獻儀爵奠案右玷上三獻畢鳴

贊唱飲福受胙引贊引攝獻官升階贊詣福胙位跪攝獻官跪引贊  
贊飲福酒太祝生跪授福爵攝獻官受爵三飲以虛爵授太祝生太  
祝生受興復於坵引贊贊受福胙陳設生跪授胙攝獻官受胙仍授  
陳設生陳設生受興捧出俟禮畢歸胙引贊贊叩興攝獻官行三叩  
頭禮興引贊贊復位攝獻官揖出復位鳴贊唱叩興攝獻官行三跪  
九叩頭禮興鳴贊唱徹饌陳設生詣案前一叩頭興恭捧饌盤由祠  
堂中門出瘞於瘞所鳴贊唱送神跪叩興攝獻官行三跪九叩頭禮  
興鳴贊唱讀祝者捧祝進帛者捧帛恭詣燎位太祝生捧帛生各詣  
案前三叩頭興捧祝帛由祠堂中門出恭送詣燎所引贊贊詣望燎  
位攝獻官詣望燎位引贊贊望燎祝帛焚畢引贊贊復位攝獻官復  
位引贊引攝獻官升階贊詣始祖考妣神位前跪攝獻官跪引贊贊  
奉主入櫝陳設生捧主入櫝引贊贊叩興攝獻官行一叩頭禮興引  
贊引攝獻官以次詣二世祖考妣三世祖考妣中興祖考妣各神位

前藏主如始祖考妣位前儀藏主畢引贊贊復位攝獻官揖出復位  
鳴贊唱禮畢乃退后土祠同釋奠日行禮其儀三獻前後各行一跪  
三叩頭禮考釋菜之禮朱子曰猶贊也婦見舅姑其贊棗栗脯脩若  
廟見則釋菜弟子見師其贊束脩若禮於先師則釋菜其禮比釋奠  
爲最簡不酌鬯不列饌不作樂不授器又按五禮新儀釋菜每位左  
一簋實鹿脯右一豆實芹筍菁韭之菹犧尊一以實汎齊今闕里釋  
菜以每月朔每壇陳二簋二豆實以果菹設尊爵盥洗如釋奠儀是  
日質明衍聖公率官員族人詣廟行禮大成殿及家廟衍聖公主獻  
行一獻三跪九叩頭禮崇聖祠啓聖祠大成啓聖兩寢殿及兩哲兩  
廡崇聖祠從祀分獻攝獻行事崇聖啓聖兩祠皆一獻行二跪六叩  
頭禮歲時常祭之禮其舉有七元旦一上元一端陽一中秋一重  
陽一冬至一歲除其儀設簋豆爵洗如釋菜儀家廟衍聖公主祭不  
灌鬯不奠帛讀祝上香三獻陳饌徹饌迎神送神行三跪九叩頭禮

崇聖祠攝獻從祀分獻儀並上香三獻迎送神行二跪六叩頭禮月  
望行香儀每月望日衍聖公率官員族人詣大成殿家廟行三跪九  
叩頭禮崇聖祠啓聖祠行二跪六叩頭禮凡衍聖公家有舉則奉祝  
文告於家廟其儀如歲時常祭之儀五月二十九日爲中興祖誕辰  
預設祭案牲俎於詩禮堂壺尊一在東楹盥洗在階下東南直東榮  
設燎鑪於西階下衍聖公拜位在中階上陪祭官員族人各按昭穆  
品級之次祭用鉶一簋一簋四豆四是日質明衍聖公率官員  
族人詣家廟拜位前立鳴贊唱排班齊唱跪叩興衍聖公以下行  
一跪三叩頭禮興引贊贊升壇引衍聖公升壇引贊贊詣始祖考妣  
神位前跪衍聖公跪鳴贊贊唱皆跪陪祭官員族人皆跪引贊贊進香  
上香叩興衍聖公上香行一叩頭禮興鳴贊贊唱叩興官員族人皆隨  
行一叩頭禮興引贊贊詣二世祖考妣三世祖考妣神位前並上香  
如正位儀官員族人不隨行禮引贊贊詣中興祖考妣神位前跪衍

聖公跪鳴贊唱皆跪陪祭官員族人皆跪引贊贊啓櫝出主叩興行  
聖公行一叩頭禮興鳴贊唱叩興皆行一叩頭禮興引贊贊請主執  
事者奉三主出由中階降恭安詩禮堂衍聖公由東階降率官員族  
人出東旁門詣詩禮堂引贊引衍聖公就拜位前立鳴贊唱執事者  
各司其事排班班齊座毛血迎神跪叩興衍聖公以下行二跪六叩  
頭禮興鳴贊唱興帛行初獻禮引贊贊升壇詣盥洗所盥手進巾洗  
爵進巾詣酒尊所司尊者舉彝酌酒詣神位前跪叩興衍聖公行二  
叩頭禮興鳴贊唱皆跪叩興官員族人皆隨行一叩頭禮興引贊贊  
進帛捧帛者跪進帛贊獻帛衍聖公獻帛贊進爵捧爵者跪進爵贊  
獻爵衍聖公獻爵不贊行一叩頭禮興引贊贊詣讀祝位跪衍聖公  
跪鳴贊唱皆跪官員族人皆跪引贊贊讀祝太祝生至祝案前跪三  
叩頭捧祝文讀曰維年月日幾十幾代孫襲封衍聖公某等敢昭告  
於中興祖文宣公神位前曰惟祖溯厥初生適逢家難似續一綫香

祐克延明德惟馨繁衍後裔子孫永保弗替引之茲遇誕辰謹以牲  
帛醴齊粢盛庶品式陳明薦尚饗讀畢興安龕內三叩頭退引贊贊  
叩興衍聖公行三叩頭禮興鳴贊唱叩興官員族人皆行三叩頭禮  
興引贊贊復位衍聖公復位鳴贊唱行亞獻禮行終獻禮皆如初獻  
儀三獻畢鳴贊唱飲福受胙引贊贊升壇詣福胙位跪衍聖公跪鳴  
贊唱皆跪官員族人皆跪引贊唱飲福酒受福胙叩興衍聖公飲酒  
受胙行三叩頭禮興鳴贊唱叩興官員族人皆行三叩頭禮興引贊  
贊復位衍聖公復位鳴贊唱徹饌送神跪叩興衍聖公以下行二跪  
六叩頭禮興鳴贊唱讀祝者捧祝進帛者捧帛恭詣燎位引贊贊詣  
望燎位衍聖公詣望燎位引贊贊望燎祝帛焚畢引贊贊復位鳴贊  
唱奉神主入家廟執事者奉三主入家廟安龕內衍聖公隨神主至  
位前引贊贊跪衍聖公跪鳴贊唱皆跪官員族人皆跪引贊贊奉主  
入櫝叩興衍聖公行一叩頭禮興鳴贊唱叩興官員族人皆行一叩

頭禮興引贊贊復位衍聖公復位鳴贊唱跪叩興衍聖公以下行一  
跪三叩頭禮興鳴贊唱禮畢皆退尼山書院以至聖先師誕日忌日  
釋奠洙泗書院聖澤書院並以春秋次丁釋奠各以其書院之博士  
學錄主祭儀注祭品悉如大成殿釋奠之儀尼山書院釋奠時同日  
致祭其書院之啓聖祠二世祖祠三世祖祠祭品行禮皆準祖廟釋  
奠啓聖祠家廟附位之儀尼山神毓聖侯祠準祖廟后土祠儀尼山  
書院祝文曰惟祖坤靈毓粹尼阜降祥篤生我祖扶植綱常萬世永  
賴子孫其昌茲遇遠辰謹以牲帛醴齊粢盛庶品式陳明薦以復聖  
顏子宗聖曾子述聖三世祖亞聖孟子配尚饗洙泗書院祝文曰惟  
祖聖毓尼防教開洙泗六經闢道萬世爲師茲惟仲春謹以牲帛醴  
齊粢盛庶品式陳明薦以復聖顏子宗聖曾子述聖三世祖亞聖孟  
子配尚饗聖澤書院祝文曰惟祖大行有光出宰中都治惟一年澤  
留萬世茲惟仲秋謹以牲帛醴齊粢盛庶品式陳明薦以復聖顏子

宗聖曾子配尙饗中庸書院春秋上丁世襲五經博士生祭正位配  
位皆八簋八豆設尊俎盥洗如祖廟儀其日博士具朝服鳴贊唱就  
位瘞毛血迎神跪叩興博士行二跪六叩頭禮興鳴贊唱奠帛行初  
獻禮引贊贊升壇詣盥洗所盥手進巾洗爵進巾詣酒尊所司尊者  
舉釥酌酒詣述聖三世祖神位前進香上香跪叩興博士行一叩頭  
禮興引贊贊進帛獻帛進爵獻爵博士獻帛爵行一叩頭禮興引贊  
贊詣亞聖孟子神位前上香獻帛爵如正位儀引贊贊詣讀祝位跪  
博士就位跪引贊贊讀祝太祝生至祝案前跪三叩頭捧祝文讀曰  
維年月日幾十幾代孫世襲翰林院五經博士某敢昭告於述聖三  
世祖神位前曰維祖道統傳家師曾啓孟述作中庸垂教千古茲惟  
仲秋謹以牲帛醴齊粢盛庶品式陳明薦以亞聖孟子配尙饗讀畢  
安正位篚內三叩頭退引贊贊叩興博士行三叩頭禮興引贊贊復  
位博士復位鳴贊唱行亞獻禮行終獻禮皆如初獻儀鳴贊唱飲福



受胙引贊贊升壇詣福胙位跪博士跪引贊贊飲福酒受福胙叩與  
博士飲福受胙行三叩頭禮興引贊贊復位博士復位鳴贊唱徹饌  
送神跪叩興博士行二跪六叩頭禮興鳴贊唱讀祝者捧祝進帛者  
捧帛恭詣燎位引贊贊詣望燎位望燎祝帛焚畢引贊贊復位博士  
復位鳴贊唱禮畢掃墓儀以清明節十月朔日預設牲俎祭品及尊  
爵壘洗於墓前衍聖公率族人詣聖林鳴贊唱排班齊唱跪叩興  
衍聖公以下行一跪三叩頭禮興鳴贊唱奠帛行獻禮引贊贊升壇  
盥手進巾洗爵進巾詣酒尊所司尊者舉爵酌酒詣聖墓前跪衍聖  
公跪鳴贊唱皆跪族人皆跪引贊贊進帛獻帛進爵獻爵叩興衍聖  
公獻帛爵行一叩頭禮興鳴贊唱叩興族人皆行一叩頭禮興引贊  
贊復位衍聖公復位鳴贊唱跪叩興衍聖公以下行一跪三叩頭禮  
興禮畢次詣二世祖墓三世祖墓廬墓堂中與祖以下至衍聖公之  
高曾祖禰諸墓次祭掃奠帛酌獻皆如前儀是日孔庭族長分詣啓

聖林祭掃如前儀

述曰三代之禮久廢其所存者特千百之什一耳今考闕里諸儀若灌鬯若炳蕭若祝史迎神門外若三獻洗爵而後登皆駸駸乎有古之遺焉然尙有可議者數端大成釋奠

朝廷之命祀也家廟時薦子孫之私享也崇聖祠旣建而啓聖祠舊像具瞻有其舉之雖不可廢亦當別諏吉日以遠煩瀆或如書院改用次丁皆可今至聖述聖旣祀於大成殿啓聖伯魚旣祀於崇聖祠而啓聖祠及家廟復同日並舉有重祭之嫌一也洗而後獻所以致其潔也乃裸獨不洗異於古禮之每酌必洗二也少牢饋食禮有主人北面酌酒之文唐宋釋奠猶司尊者舉簋主獻官受爵親酌所以昭其虔也今三獻雖親洗而不親酌三也古者吉祭主人就阼階無由西階者今太學之儀主祭官升降亦皆由東階獨闕里釋奠升則東階而降則西階四也禮尸命祝祝嘏主人所謂工祝致告也故唐

宋儀福胙皆受自祝今則略其儀直受胙於執事者而不復假祝五也釋奠用中和韶樂而迎神送神則以教坊樂引導雅鄭雜陳疑嫌於襲六也宋元時升殿降殿酌獻配位皆別有樂章自明至今樂祇用六成儀節煩而樂章短奏者每遲其聲以俟之音節頗近曄緩若於酌畢將獻時然後起樂獻畢出殿樂亦隨止不必俟復位而後闕可變曄緩之音應中和之節七也天下文廟皆四配十二哲獨三書院哲位猶未改舊制且聖澤書院祇配顏曾而不及思孟又學官皆立崇聖祠而書院猶未立八也汾學膚識淺何敢妄議禮樂然於茲數者竊謂未安不敢自隱用綴篇末以備主鬯者之採擇云爾

闕里文獻考卷十九終

闕里文獻考卷二十

禮第五之二

歷代帝王過魯祠孔子或進爵再拜或行酌獻禮及遣官祭告降香諸儀前籍略之皆不可得而詳矣今惟錄

本朝儀注於左

**皇帝釋奠儀**先期太常寺官恭設

**皇帝**拜位於殿門內正中設祝版案於供案右南向尊案於殿內東南隅西向分獻東配東哲尊次之西配西哲尊在西南隅東向兩廡獻尊各在其門內左東廡北向西廡南向燎爐在殿階下西南東向牲牢籩豆如四時上丁釋奠之數是日禮部太常寺堂官奏請

**皇帝**躬詣行禮扈從王等內大臣侍衛文武官三品以上地方文官知府武官副將以上衍聖公及五氏有頂帶官員俱陪祀其餘扈從及地方文武各官俱於

行宮兩旁排班候

駕出跪送

皇帝具補服陞輦儀仗全設進曲阜南門至奎文閣前降輦贊引官對  
引官恭導

皇帝由甬道中行至大成殿拜位前立典儀唱樂舞生就位執事官各  
司其事贊引官奏就位

皇帝就拜位立典儀唱迎神協律郎唱舉迎神樂奏咸平之章樂作贊  
引官奏跪叩興

皇帝行三跪九叩頭禮興王以下陪祀各官及分獻官俱隨行禮畢樂  
止典儀唱奠帛行初獻禮捧帛官捧爵官前進向西立協律郎唱舉  
初獻樂奏寧平之章樂作捧帛官跪進帛於

皇帝右贊引官奏獻帛

皇帝受帛拱舉仍授捧帛官捧帛官跪接捧至先師位前跪奠畢三叩

頭退捧爵官跪進爵於

皇帝右贊引官奏獻爵

皇帝受爵拱舉仍授捧爵官捧爵官跪接捧至先師位前跪獻畢退次讀祝官至祝版案前三叩頭捧祝文於案左祇俟樂止贊引官奏跪皇帝跪王以下陪祀各官及分獻官讀祝官俱跪贊引官贊讀祝讀祝官讀畢捧祝版至先師位前跪安帛匣內三叩頭退樂作贊引官奏叩興

皇帝行一跪三叩頭禮興王以下陪祀各官及分獻官俱隨行禮其分獻各官依序引至四配十一哲兩廡各神位前立獻帛爵畢各復位樂止典儀唱行亞獻禮捧爵官前進向西立協律郎唱舉亞獻樂奏安平之章樂作捧爵官跪進爵於

皇帝右贊引官奏獻爵

皇帝受爵拱舉仍授捧爵官捧爵官跪接獻爵於左退分獻官各獻爵

如初獻儀獻畢樂止典儀唱行終獻禮捧爵官前進向東立協律郎唱舉終獻樂奏景平之章樂作捧爵官跪進爵於

皇帝左贊引官奏獻爵

皇帝受爵拱舉仍授捧爵官捧爵官跪接獻爵於右退分獻官各獻爵如亞獻儀獻畢樂止樂舞生引退典儀唱徹饌協律郎唱舉徹饌樂奏咸平之章樂作樂止典儀唱送神協律郎唱舉送神樂奏咸平之章樂作贊引官奏跪叩興

皇帝行三跪九叩頭禮興王以下陪祀各官及分獻官俱隨行禮畢典儀唱捧祝帛饌恭詣燎位

皇帝轉立東旁捧祝官捧帛官前進三叩頭捧祝帛起捧饌官跪不叩捧饌起依次出中門恭詣燎位

皇帝還位立祝帛焚半贊引官奏禮畢

皇帝出至奎文閣前陞輦作樂

還行宮不陪祀扈從官及地方文武各官於

行宮兩旁跪迎候

駕過各退此康熙二十三年儀注也乾隆年間儀注惟改立獻爲跪獻  
改十一哲爲十二哲改舊樂用新樂餘悉同又舊於同日

遣官祭啓聖祠今

遣官祭崇聖祠其儀贊引官對引官引承祭官入崇聖祠左門至盥洗  
處盥手畢典儀唱執事官各司其事贊引官贊就位承祭官就位立  
典儀唱迎神贊引官贊跪叩與承祭官行三跪九叩頭禮興典儀唱  
奠帛行初獻禮贊引官贊升壇承祭官入殿左門贊詣肇聖王位前  
承祭官詣位前立贊跪承祭官行一跪一叩頭禮興贊奠帛捧帛官  
跪進承祭官受帛拱舉立獻畢贊獻爵捧爵官跪進承祭官受爵拱  
舉立獻畢行一跪一叩頭禮興贊引官以次贊詣裕聖王詣聖王昌  
聖王啓聖王各位前奠帛獻爵如前儀贊引官贊詣讀祝位承祭官



詣讀祝位立讀祝官至祝版案前三叩頭捧祝版立於案左贊跪承  
祭官讀祝官俱跪贊讀祝讀祝官讀畢捧祝版跪安正位案上帛匣  
內三叩頭退贊叩興承祭官行一跪三叩頭禮興贊引官贊詣先賢  
顏氏位前承祭官詣位前立贊跪承祭官行一跪一叩頭禮興贊奠  
帛捧帛官跪進承祭官受帛拱舉立獻畢贊獻爵捧爵官跪進承祭  
官受爵拱舉立獻畢行一跪一叩頭禮興贊引官以次贊詣先賢曾  
氏先賢孔氏先賢孟孫氏各位前奠帛獻爵如前儀畢贊引官贊復  
位承祭官復位立典儀唱行亞獻禮獻爵於左如初獻儀典儀唱行  
終獻禮獻爵於右如亞獻儀典儀唱徹饌唱送神贊引官贊跪叩興  
承祭官行三跪九叩頭禮興典儀唱捧祝帛饌各恭詣燎位捧祝帛  
官至各位前三叩頭捧祝帛起捧饌官跪不叩捧饌起依次送至燎  
位承祭官退至西旁立候祝帛過仍復位立典儀唱望燎贊引官贊  
詣望燎位承祭官至燎位立焚祝帛贊禮畢退

皇帝御詩禮堂講書儀鴻臚寺會同衍聖公預設

御座於詩禮堂正中設經案於

御座東南西向

勅諭案在經案之南西向講書案在前楹內東偏北向內閣中書恭捧勅諭翰林院官捧講章各陳於案釋奠禮畢

皇帝憩幄內應聽講各官至詩禮堂序立衍聖公率講書官及各博士觀禮族人序立承聖門外道右候

皇帝出幄步入詩禮堂衍聖公等跪接

皇帝陞座衍聖公以下由承聖左門入至詩禮堂階下序立贊禮郎唱排班鴻臚寺官引衍聖公以下排班贊禮郎唱跪叩與衍聖公等行三跪九叩頭禮興贊禮郎唱講書執事官恭設經案於

御前講書官出班升階至詩禮堂簷下行一跪三叩頭禮興退立楹前西向序立講四書官先至案前講畢退原立處講經官次至案前講

畢退原立處同降階復位贊禮郎唱宣

勅諭大學士恭詣案前捧

勅諭降至庭中西向立衍聖公以下皆跪大學士恭宣

勅諭畢贊禮郎唱跪叩興衍聖公以下行三跪九叩頭禮興趨出候送駕禮畢

皇帝還行宮

皇帝詣聖墓前酌酒儀是日

皇帝御常服詣孔林隨行禮之王公大臣官員等預往聖林門外下馬進至墓門前候

駕光祿寺堂官將爵案奠池設月臺正中武備院官設拜褥隨從大臣侍衛官員至聖林門外下馬

皇帝過洙水橋至墓門降輿禮部堂官前導由中門入鴻臚寺官引王公以下三品文武大臣侍衛官員隨入在享堂外兩傍排立

皇帝陞月臺詣拜褥跪眾皆跪執事官酌酒大臣跪進爵

皇帝酌酒三爵每爵行一叩頭禮眾皆隨行禮禮畢王公大臣等先出  
禮部堂官前導

皇帝由中門出陞輿還

行宮

遣皇子祭告儀祭日辰時

皇子具蟒袍補服至聖廟大門外下馬贊引官對引官引

皇子由東門入至盥手處贊引官贊盥手盥手畢引

皇子至殿外月臺上拜褥前立典儀官唱樂舞生就位執事官各司  
其事贊引官贊就位

皇子升拜褥上立典儀官唱迎神典樂官唱迎神樂奏咸平之章樂  
作贊引官贊跪叩興

皇子行三跪九叩頭禮興樂止典儀官唱奠帛行初獻禮捧香帛官

詣案前左捧爵官詣案側左皆北向立典樂官唱初獻樂奏寧平之章樂作贊引官贊升壇

皇子由殿左門入至香案前贊引官贊跪

皇子跪贊上香捧香官跪進香

皇子接香盒拱舉授捧香官

皇子興上炷香次上三瓣香贊引官贊跪

皇子跪行一叩頭禮興贊引官贊奠帛捧帛官跪進帛

皇子接舉立獻案前正中贊引官贊獻爵捧爵官跪進爵

皇子接爵拱舉立獻案上正中站上行一叩頭禮興贊引官贊詣讀

祝位

皇子就讀祝位立讀祝官就祝案前三叩頭捧祝文立案左樂止贊

引官贊跪

皇子跪贊引官贊讀祝讀祝官跪讀祝畢恭捧祝文至位前跪安案

上筐內三叩頭退樂作贊引官贊叩興

皇子行三叩頭禮興贊引官贊復位

皇子復位樂止典儀官唱行亞獻禮捧爵官捧爵詣案側左北向立典樂官唱亞獻樂奏安平之章樂作贊引官贊升壇

皇子由殿左門入詣神位前贊引官贊跪

皇子跪行一叩頭禮興贊引官贊獻爵捧爵官跪進爵

皇子接爵拱舉立獻於左坫上行一叩頭禮興贊引官贊復位

皇子復位樂止典儀官唱行終獻禮捧爵官捧爵詣案側右北向立典樂官唱終獻樂奏景平之章樂作贊引官贊升壇

皇子由殿左門入詣神位前贊引官贊跪

皇子跪行一叩頭禮興贊引官贊獻爵捧爵官跪進爵

皇子接爵拱舉立獻於右坫上行一叩頭禮興贊引官贊復位

皇子復位樂止典儀官唱徹饌典樂官唱徹饌樂奏咸平之章樂作

樂止典儀官唱送神典樂官唱送神樂奏咸平之章樂作贊引官贊跪叩興

皇子行三跪九叩頭禮典樂止典儀官唱恭捧祝帛香饌詣燎位捧祝帛官前進三叩頭捧祝帛起捧香饌官不叩跪捧香饌起以次由殿中門出送詣燎位

皇子退至西旁立俟祝帛香饌過

皇子復位立焚祝帛半贊引官贊禮畢引

皇子由東門出此雍正八年儀注故仍用舊樂是日

遣郡王祭告崇聖祠其儀與

皇帝幸闕里

遣官祭崇聖祠儀同惟不獻配位爲異

遣官祭告儀祭日黎明陪祭各官俱穿朝服在櫺星門列班候接

祭文由中門入承祭官隨入陪祭各官由左右門入引贊贊盥手承祭

官盥手畢引贊引至拜位前立鳴贊唱樂舞生就位執事者各司其事陪祭官就位承祭官就位瘞毛血迎神典樂唱樂奏昭平之章鳴贊唱跪叩興承祭官陪祭官俱行三跪九叩頭禮興樂止鳴贊唱奠帛行初獻禮捧香帛官詣案前左捧爵官詣案側左皆北向立典樂唱樂奏宣平之章引贊贊升壇詣先師孔子神位前承祭官由東階上進殿左門至拜所立引贊贊上香跪鳴贊唱眾官皆跪引贊贊進帛獻帛進爵獻爵承祭官跪上香獻帛爵訖樂止引贊贊讀祝讀祝官三叩頭捧祝版讀畢興跪安篚內引贊贊叩興承祭官行一跪三叩頭禮興陪祭官亦行一跪三叩頭禮興引贊贊復位承祭官復位鳴贊唱行亞獻禮典樂唱樂奏秋平之章引贊引承祭官升壇獻爵如初獻儀樂止鳴贊唱行終獻禮典樂唱樂奏敔平之章引贊引承祭官升壇獻爵如初儀樂止鳴贊唱飲福受胙引贊引承祭官詣福胙位跪鳴贊唱眾官皆跪引贊贊飲福酒受福胙承祭官飲福受胙



訖行一跪三叩頭禮興陪祭官亦行一跪三叩頭禮興引贊贊復位  
鳴贊唱跪叩興承祭官陪祭官俱行三跪九叩頭禮興鳴贊唱徹饌  
典樂唱樂奏懿平之章樂作樂止鳴贊唱送神典樂唱樂奏德平之  
章鳴贊唱跪叩興承祭官陪祭官俱行三跪九叩頭禮興鳴贊唱恭  
捧祝帛詣燎位引贊引承祭官詣望燎位焚祝帛畢復位鳴贊唱禮  
畢

遣官詣啓聖王墓前酌酒儀先期廟庭執事官陳奠池於啓聖王墓前  
陳拜位於奠池前陳尊一爵三於墓東南有案是日酌酒官至由墓  
左門入至拜位前北向立衍聖公陪位捧爵官酌酒以次至酌酒官  
右西向立酌酒官跪捧爵官跪進爵酌酒官受爵酌酒以虛爵授捧  
爵官捧爵官受爵興退酌酒官叩頭凡三酌酒三叩頭興禮畢退由  
原門出

述曰

皇帝詣學禮止三獻六拜康熙二十三年恭遇

聖祖仁皇帝親釋奠於闕里禮官以國學儀注上奏奉

旨特改爲三跪九叩而我

皇上三幸曲阜禮官仍議禮如初

皇上皆不允所請今且載之會典垂爲令式尊師重道實依古以來所未有也

闕里文獻考卷二十終